

牧
庵
集
附
錄
六





牧 庵 集

附 錄

(六)

姚 燧 撰

牧庵集卷二十八

墓誌銘

南京路總管張公墓誌銘

公諱庭珍字國寶曾大考淵大考士明以武力再世爲金千夫長家臨瀆之全州考楫北京都轉運使故又家北京公于次爲中子沈靜易直通穀辨彊綜經緯史尤長左氏春秋筮仕已存愛民利物志事先帝以典內帑受知先是高句驪不請徙居海中江華島上遣使問何由且調其貳服親擇廷臣可者卽命公時年二十三至其國王禮事之甚恭書言吾歲入幣大國未嘗不謹臣職非與未臣而敵已臣而叛者比而大軍歲入邊刈吾人民奴吾子女有吾貨財蹙吾土疆吾是以捨衍而完險誠出甚不得已之謀非首鼠他圖爲也未疏黃金以兩計白金以鎰計各千百數爲壽又言誠以是懷懷之言歸聞之上幸止邊軍無歲入願歲幣外別入如今相壽者數歲歲爲謝公勃然曰王以天子之使求貨來耶揮去歸具道王言且保其國無他避掠徙耳上亦悟曰人歲入幣事之又加兵罪之誠何以待不臣而敵已臣而叛者詔令軍止戍邊無入掠自是完東夷室家父子無慮萬億計自將伐宋從至閩中留爲安撫使治兵裏摩創殘外供仗糧不擾而集今上卽位中統建元自將北伐以公先朝故臣熟西京入漠南路俾置傳驛兼給饋餉至元四年授同僉吐蕃經略使兵裁叛離仁革狠頑渠酋讐撓滋久安順六年授朝列大夫佩金符責

貢安南時已徵天下兵數十萬圍襄陽實爲蹶宋起本勳臣故相上與咨軍國謀不可一日離側者皆出行省董師公至其國王立受詔公詰曰王行非止違命千禮于利害且不熟知揆此邦人民土地不當天朝一總管治皇帝不欲郡縣王地版籍王民聽其稱藩遣使諭旨德至渥也且王以與宋輯睦緩急而援今百萬之師長圍襄陽鳥飛路絕朝夕將拔席卷渡江覆其國都易如振槁王猶倔岸海徼特爲唇齒自矜尊高事且上聞天威小震無煩遠召中國雲南十萬之師再月可至則邱墟王廟草棘王庭者將不難爲其審策之王屈降拜益慚憤將以兵恐公使力士白刃環衛公迺示怠弛袒寢一室盡擲所懸箭弓刀槊付衛士聽汝何爲暑渴甚每取江水以進皆溫惡不可飲食及索井汲不許曰吾俗不相悅者多投毒井中殺人公曰自所求毒死不恨終汲飲食自若安南君臣多畏公者八年會公以安南貢至襄陽猶未拔即授行省郎中承事勳貴巉絕不阿惟見之營衛足蹟不及其門商較事宜言閎色厲或有以凌鷺見短者故右丞相史忠武公天澤解之曰是其爲心忠正侃侃人也久觀其人必實吾言十年襄陽下改省爲行樞密院以勞遷中順大夫遙知歸德府行行院經歷大軍南規渡江復行省公復郎中俄降虎符襄陽路總管陳府尹毀城樓以完廟學散契丹軍以惜月廩剗弊施宜當其先後明年改監郢復二州位安撫使上捐魚荻之賦使人厭腥食家給蒸薪月發食以贍餓乏視便輒行行事已劾聞十四年陸嘉議大夫監平江路位總管上郢復民聞去遮馬號送萬數其治平江考績亦最他路十五年改同知浙東道宣慰使未行改大司農卿丁內艱時軍興法聞喪不得輒行乞奔赴不報公願還所受制書爲民行省知不

可奪歸之。旋釐枵然。金玉美色皆無有。惟文書襖被而已。今中書省右丞相巴延。夙嘗疑爲凌轢者。後顧爲深知公。嘗語人曰。諸將渡江。無有不荒貪。獨予與國寶清慎自持。聞者以爲知言。公家居四年。又終外艱。十九年。以才起復。仍故官嘉議大夫。南京路總管。兼開封府尹。至治之初。見星而出。見星而歸。凡前政積事留獄。旬月剖摘皆出。尤善發姦伏。有控鶴十餘輩。比公至。僦大第。聚居二年。黃金橫帶。出入飲食。街陌縱橫。人謂其真也。公曰。控鶴役在京師。久此不行。必劇賊也。密喻有司。以意期。三日盡致其黨。索賊以來。得金帛寶玉。服玩典寶。券契盈室。鞠之。皆款服。物則椎埋所獲。妻妾僕使。皆掠民子女或娼妓。明日告曉市中。皆杖死。民駭其神捷。閭閻乏食。已聞未報。輒止稅勿輸。明年河北大旱。民流徙就饒。及河朔數萬人。郡縣畏損戶罪。謾以逃聞。省部遣使分道邀之。許發倉人給三月食。還所籍。民聚謀曰。吾得食三月。負難歸。重難勝。鬻將何噉。且各賣質田廬而南。至家何爲。愁歎無聊。若出一喙。公謂其使曰。斯民非賊。河南非別界。皆聖上民社也。非不知奉命。不輒濟。可以無罪。誠不忍老稚頓踣。吾治甘受禍。以活此民。則下令諸津急濟。果有以專行上告者。事下。御史大夫卽治廉之。境民皆曰。吾侯賢牧。其爲開封斷不阿。可當今代包拯。大夫察其無他。薄責而歸。奏寢不下。秋雨潦。河決原武。泛杞灌太康。自京北東。潢爲巨浸。廣員千里。冒垣敗屋。人畜流死。公括商人漁子船百十艘。又編木爲筏。具糗糒。載吏離散四出。往取避水升邱巢樹者。所全活以口計。無慮百千。水又齧京城。入善利門。波流市中。晝夜董役。土薪木石。盡力以與水鬪。不少殺。乃崩城堰之。城害旣弭。復大發數縣民。增外堤防。分直爲三。直役一月。逃罰作倍。起陽武黑石。東盡

陳留張弩河綿亘三十里。如期三月隄防悉完。以至元甲申七月二十二日卒官舍。年五十六。河南之民識與不識。如喪其親戚。家纔餘俸半月。將歸葬。貧不能西。開封市民雄財者。戶賻之。又遣子弟數百人持錢分程具奠。越別治洛陽五百里。凡千里。及潼關。以其年九月葬。安西府咸寧縣洪同鄉少陵原都運公瑩之左。夫人何氏溫淑靜端。男子三人。岳提舉郢復魚湖。崇西蜀行省宣使。岱未仕。女子三人。一適太平州錄事韓和一。適紀德信。一適鞏思齊。後三年其季大中大夫。諸蠻夷部宣慰使庭瑞以燧素知公。求銘其墓。辭曰。

年五十六。固不云夭。較齊耄耆。孰謂壽考。究其致之。豈無以然。國苟有利。棄身若捐。東北雞林。擊舟以使。西南雕題。登馬已至。視數萬里。爲步仞餘。招麾兩王。噉臺指輿。吐蕃獫狁。化不犯令。由積苦勞。至不延命。壽也無稱。世不爲臧。死有可述。短不害長。襄陽軍謀。郢復民效。已實已著。猶其小小。開封蠲租。舟民于河。電擊霆馳。懸躬禍羅。下燭其忠。由明后聖。老幹經摧。霜風踰勁。大浸稽天。陸舞龍蛇。流死所餘。邱木是家。乃集舟航。乃筏以繼。乃求以濟。取置平地。穴陣摧防。萬杵登登。役不踰時。隱其阜陵。民流他疆。我飫其食。我疆殄傷。皆手援溺。顯顯公哉。人之騶虞。彼饑焚焚。橫目虎羆。雖古循吏。列傳史冊。載筆今功。孰作爲匹。少陵之原有坊其邱。銘石道周。以暴諸幽。

中奉大夫荊湖北道宣慰使趙公墓誌銘

至元十七年。授公陝西漢中道提刑按察使之命。下燧時已爲副。雖公未至。實與聯銜。遇凡狀聞臺。吾曹

代書使名者一年。及中丞王博文來使。乃有不得一際顏色之恨。後燧轉副山南湖北憲。治江陵二十三年。入直翰林。明年公以中奉大夫。使持節宣慰荊湖北道。亦治江陵。終不能相遭。以卒後四年。當三十有一年。燧如龍興。始識公之季子大中。江州總管。兼管內勸農。愛其忠厚和粹。薰然克世其家素範者。常同郎中馬昫登廬。數多忘其爲新識者。歸復過之。益相歡也。出故李君槃所撰墓碑。猶未有埋銘。因思與公陝西未嘗同事。而嘗同銜。湖北未嘗同時。而實同治。其慕義區區。雖所雅好。有不如也。今日燧直翰林。視槃翰長爲同事。同階同時而同治者。槃銘公于昭昭。燧不能暴之于幽乎。燧曰。固所志也。乃敘之。令事以類從。積官以大。中中順嘉議通議正議。以及中奉。受任凡十九。歷中外四十八年。莅民則襲永安軍節度使。丞眞定之藁城。尋爲令。會憲宗大料民。公令藁人損其戶數。得親戚同籍。及後賦下戶。歲白金四兩。而藁果不困。人已服有經遠謀。民有崔進王成共飲成歸。而進失其處。其兄認成殺之。縣掠成服。時州縣得專誅。公疑不得其尸。緩不卽令償死。踰月。淖沱冰開。而尸出。驗覈無他。乃由醉墮水死。成乃脫繫。時年少而位卑。人善其能用獄。他日遷眞定路總管判官。東京西京大都南京四總管。惟東京虎符。西京南京兼尹。大同關封府。東京當高麗倭奴用兵之衝。其間渤海女眞契丹錯居。俗各異宜。他人得此。率謝不往。公居三年。諸夷帖帖。白燕巢堂。士多祥而詩之。西京大荒。聞于朝。得發倉儲以丐貧饑。民賴全活。不流徙。聞令下采民女。姿德宜者。貢實掖庭。公上言。山西回遠京師。且無大家。民女貧陋。無有可充椒房下陳。徒生民心。使育女嫁。姻年不及幣。徵不納。惟幸有男無託。殺禮戾古。天生素俗。甚非聖世之盛舉也。同列

危之避不連署。公曰：此出我獨。竟上之。事亦報罷。南京未行。裕宗在東京止之也。治賦則銀符真定路。宜課副使。改課稅所長官。陞轉運使。領東京路鐵冶。考績皆最。職兵則千夫長。從征李璫濟南。在東京南京兼諸軍。敖拉總管。持憲則山東東西山北遼西陝西漢中提刑按察。惟山東爲副按。行部治獄。無滯囚。曹州屬縣禹城。械至二賊。曰：嘗殺人者。隨聽錄之。兩人之明非辜。言色殊倖直。乃移讞疑獄。清而眞賊得二人者。以出。凡今條責。以課農桑。勵學校。問民疾。以肅風俗。職無不舉者。在庭則歷兵戶禮三部尙書。建言省部。任人率先其私。非獨名器所由以濫。且大啓仕者之爭。其敢而無畏者。至遮乘輿以訟。此風豈可崇長。而不思有以哀之乎。及持使節。宣慰荆湖。受命湖省。而犯法臣肆其兇饕。特有中援。威福張甚。欲惟以盜戶富財牢籠。乃大料民。兄弟籍者。皆異之。雖舟人田客僑遊不遺。集吏計局。不給紙燭。又市紗羅。小其時直。又賦之民。復爲憑怒。曰：吏賦民得者。皆官有之。又大鉤考積歲稽逋。立期送官。榜掠號哭之聲相聞。民至鬻田屋。嫁妻女。或赴水自戕死。定無責。責償親戚鄰里。或嘗主何人家者。又逼官吏。令首嘗受所治民財。及酒食饋遺。督責之使。日十餘輩。燕犒送迎不少遑。其特勢須索者。無敢少逆其言。一都司貪與妾語。宣副跪行酒。移晷不持觴。省顧總管有與吾姻者。責令首償。曰：吾未嘗取民一錢。不從。乃標草老婢。令鬻得直輸之。後反由是免。嗚呼。觀同列與所臨守土若此。則公之有至難于吾胸者。從可知也。如是而難事。牢不可剔之巨盜。不見尤。方數千里不遂生之民。不疾怨而悅之。其持身以閑世故者何如也。公諱椿齡。字壽卿。滿秩荆湖。歸未十舍。道卒樊城。實二十七年十月十二日。年七十三。返葬藁縣。其鄉武家里東。

原祖瑩少從金翰林學士王若虛學年二十一中我元戊戌眞定選性孝友高明尙氣節或曰公豐頤後耳顏角炯然望知爲富貴人也維趙受姓絕遠渺可譜究者兩世祖諱福有潛德祖妣靳考諱迪以材開卒官節度永安軍妣崔故翰長李冶已敍之碑夫人王金吾衛上將軍知中山府善之女公卒十日亦卒壺儀慟然撫下有恩能升金陳高白四人者禮秩已夷不嫌庭臣賢文多序詩之子二人奉直大夫僉山南湖北道肅政廉訪司事瑗與瓚也六男孫執中守中居中行中安中柔中五女孫適崔恕劇宏董某皆名族某又中書左授士選子逾通顯光著者餘幼銘曰

胡天子公昇爾極備學善其師仕席其世言塞其責職舉其事卒遐其年生崇其位體良其敵述令其似伊誰無伉或一先棄十日偕老亦誠可異伊誰非傳聯翩伯季握符持節或守或使方古世德曰少無媿有不信焉珉石之視

河東檢察李公墓誌銘

前集賢侍讀學士今臨江路總管李侔自爲其祖河東宣撫檢察公事狀及譜其祖孫七世之系曰公會祖顏祖彥升叔祖夏考溫叔考濟沂公及兩夫人張富察氏弟彬昌鬱子昱煒燦姪炯炳耀輝女歸顏鈴梁某孫佐仔與侔也女孫歸郝天挺吳某梁某二在室曾孫墉呆垚垚均圮女曾孫五人合是七世凡四十四人求燧銘公神道燧思古人揭之石者上惟其統下惟其緒率不旁及宗從侔乃詳然豈傷喪亂以還其存今者已此將俾來者有究所自耶亦親親篤厚之道也故不略而手筆之謹按公諱懋時字逸

民太祖勦金之十年。略地太原。太原城守不卽下。屬縣榆次。其令不敢仍居平土。徙其民依險逃兵。縣東北四十里韓村砦。公爲民與母夫人及其季皆在逃中。聞拔太原。令恐策無所出。卽說公曰。金主棄河北。與河東播汴者五年。天方北顧如是。馬足所及。無不靡滅。太原河東鉅鎮。猶不能支。吾儕偃蹇此方。因謂之固。一日移兵。勢如崩山之壓卵。必無幸矣。觀公美而長身。膽膺拔類。鄉里歸心。有長者稱。袒而一呼。樹旗出降。民無有不聽命者。願公急赴是功。雖吾亦忝公使之。不敢越公令也。公曰。令自爲之。何至授人。令曰。吾力綿才薄。圖生斯人。狙黠之徒。或忿曰。金臣敢然。以義罪余。事未集。而以蹈禍。彼得以爲名。無益也。吾所以急子者。子而爲是。必不禍余。當是人自爲謀之時。一爲狙黠所先。忌汝才而併除之。如汝母氏二季。何公感其言曰。如教。乃往見太師國王穆呼哩曰。榆次小縣。衆且萬人。無柵自固。王如加兵。未必朝至。而夕下。必盡力以與王將吏鬪。雖王將吏能保其不與一死。不扶一傷乎。此勢之必至者。比其拔也。逞志而鬪。殲之。得倍百里莽曠。無人之土。王安利哉。今不汗一馬。得倍百里。有萬其衆之名。以下執事。王何以待之。王曰。吾受降多矣。無有如之人之壯者。聞其舉止。而辯于爲言。吾得士矣。且曰。吾受詔太宗。視事所便宜而行之。卽以公與太原帥攸與同議軍事。後假其弟阿禪爲王。分兵徇地平陽。輟公守太原。俾從假王以行。假王事動咨之下平陽。戢剽殺。而易置其吏。課民墾田。事與令修治有續矣。而真定同知總管武仙。將兵襲下太原。殺興。傍縣皆附。假王從公馳救。皆復之。坑其旅拒王師。及爲仙用者。獨交城爲吾守。或讒覃帥雖閉壁。實未嘗一出決戰。意視勝負誰在。以爲歸也。假王欲攻之。公遣人語帥翼曰。當悉力與賊

角不然屠矣。帥如所言出戰，敗賊北山下。假王乘高觀之，公曰：「帥無他也，遂全之。」將吏見北山石壁萬柱，玉山三寺逃民男女紛綸，白假王欲掠之。公曰：「此戰士之家，倉卒不及入城者，且其夫爲吾擊賊，何罪而掠其家？其緇服皆僧尼，得是安施？」敢復言掠者，論以軍律。寺得不殘，平生脫人于死者此類。至今三寺像事之後，甚爲中書耶律公所才。聞之太宗，授以太原路宣課所大使。公固辭，孝養其親，時年五十，徜徉家居，中書不能屈，乃官其二季。彬行省郎中，昌鬱平陽路宣課所副使，以便公事。而二季益恪，與其妻視公及兩夫人，不啻子婦于父母舅姑。兩夫人敬公如賓，相安如累弟。其化行一家者又如此。年六十一卒，實某年二月六日。葬太原城西井谷村東原，昱用事能臣也，事載他碑。故商大參左山公嘗題其墓，子孫官者，燦太原路敖拉鎮撫佐麓川路教授，仔東莞監司管勾，倜通貴矣。倣同知富州，壻其家官者。太原課稅所副使賈某，敖拉千戶梁某，千戶王某，郝天挺，四川行省參知政事張藻，主秀容簿，銘曰：

公牛襍外，美而順大。雖人所奇，猶力未賴。一朝榆次，林林凋兵。令身過之，祈主下盟。公歸師王，萬衆是率。吐策以撼，言不撓直。王曰：「之人，天以贊予，俾守太原。」真師與俱，移戡平陽。王假弟節，俾往爲佐。資用不乏，太原俄反。假王旋旗，師不越旬，翦以復之。交城已汙，教與賊戰，不待言雪。讒誣隨辨，維是河東。旣輯旣平，而還收身。菟裘是營，中書除書，拒戶不視。出焉何銳，去果亦至。丈夫見世，及物之功。觀今所就，爲薄爲豐。六十一年，不曰壽考。有子有才，銜未施報。再世之澤，濬發爲川。蕃爾後昆，世文以賢。異時何人，補遺竹帛。惟無他求，正視是石。

唐州知州楊公墓誌銘

自盜殺阿哈瑪特後。僧格使總制院。結知世祖。氣饒烜烜。燦人。倖進者入賄其家。或藉其一言。以爲事從中下。必中書官之者。月無虛旬。每爲中奉大夫參知政事。居寬所裁。甚不得已如請。乃簿所獵級干政者。俟有間。他日則引以爲稽。其不利也。一旦爲尙書左丞相誣而殺之。惟其子集賢學士奉直大夫勛。不孥。自餘妻及子景奴婢。凡資業。皆籍入縣官。僧格敗誅。故奉直大夫知唐州君居簡。始敢上疏。列明其兄自部曹史王事省掾都左右司檢王中舍郎中知府憲副侍郎宣同典外郡尙書吏曹參議中書御史中丞參行省中省政。與國宣勞。爲時才臣。章章在人口耳。今賊國臣不追誅夷。宜爲死者雪其非辜。庶彰聖代日月高懸之明。參知政事梁德珪以聞。敕有司償所籍人。而勛尋卒。無子。又哀景雖二子一女。而疾廢于辛。而女年及笄。自燕攜大參商公左山孫企伊入壻其家。自辛而唐。纔一閱月。而景卒。意者景計未至。與至而未之知。到官四十日。當元貞乙未十月三十日。而君亦卒。年止五十七。嗚呼。何天之不福中奉之家耶。身戮一室瓦裂。二子繼死。一不後。一有而弱。君訟還所籍。又爲求壻。令恤廢姪之家。處事變之極。狃薄俗之囿。少不失天理民彝之正。爲弟爲從父從祖。曰悌與慈。雖古人復作。有一尙之乎。而天之報施者。反如是也。蓋君自筮仕試吏。從萬夫長嚴忠濟。從己未渡長江後。使交鈔庫曹州。改南京轉運司知事。以善其職。從其司請陞經歷。俄授從仕郎大名路總管府經歷尹范縣。同提舉信州宣課。遷承務郎浙西宣慰司經歷。換承直郎上都留守司經歷。遭事難爲。身出任之。官長有不相能。必委曲調順。如媒氏之合二

姓始異而終同之凡此皆佐人出理者而非其所自爲也惟范縣爲近民壓于郡守有不伸及今爲唐若可以有爲而遽已此哀哉君字子敬姓楊氏漢宏農太尉震苗胄五世祖絢爲宋儀曹易州死于金兵生邦基秘書監爲金名士書畫兩絕人曰可與李公麟者埒以通奉大夫永定軍節度使致仕生郊社署令嫡自儀曹而下皆家燕皐生監歸德酒庭直避金亂莘居生灋君之考也君交人誠和視親識如故知傾貲歡樂之夫人梁氏二子二女翰林國史院檢閱官昇一未名女長適同縣士族王文讓季在室皇上卽位之年冬十一月詔修世祖三十五年實錄院直檢閱官其究覈故事職也而其末九年燧與侍讀高凝共總裁之昇也實當筆至元二十七年之一一年顧與修撰而下年分其事已可見其文賢無忝面命矣由同官相歡故介其考唐州君先摯會從史院諸賢還進史上都及與之別未數月訃至期昇會葬莘經杖言曰昇惡逆不得見先人屬纊已抱終天之恨不得公銘亦不可復食息人世矣敢泣血請乃銘之曰觀人之槩惟其在大大使可書其細已蓋嗚呼唐州其大何如流風不移天理篤居惟天于人若薄而厚雖所薄今將昌爾後人之識狹其中安知昌厚之求視銘異時

薊州甲局提舉劉府君墓誌銘

京山安陸屬縣也其永承事郎兼勸農事劉德源以邑士安某爲先來言曰先生世名篤古善文者聞今賢公卿之胄或不遠數千里及門求表著其先烈者相踵也德源之治去先生之居四舍耳心竊覲之我先人之位固不大昭于時如得先生銘則沒而名庶延也因敘曰吾劉氏居龍興黑土坂者不知始何祖

其諱與次。又不可考。實先人始以函工賜田通州。後以鍛製精堅他工。遷彰德縣院長。尋官進義副尉。徙平陽雜造局副使。再官進義校尉爲使。又官敦武校尉。薊州局使。猶領于提舉司。以勞深而資久也。制以前官超爲提舉。俄病廢。兄德淵嗣爲降同提舉。德源同知許州。實侍而南。以至元三十一年九月一日卒官舍。年六十八。顧言必葬通之樂村。以其年十二月二十五日窆焉。又曰。嗚呼。位有貴賤。故功有顯微。我先人始以函工一朝而賜服五品。其功則止善于其職。何顯之能爲。人子惟其考嘗愆于時者。始不敢求以昭明否者。其欲遠其聞者。亦豈異賢公卿胄之心也。惟哀而尤之。燧曰。凡今爲制。天下歲程。惟中不領于工曹。逕入太府。縣官親考其苦良。而黜陟之。衛士必賜而藏之家。弊則持故賜求易。使畀之新。他臣有私藏者。罪死。況私爲者。乃先人雖班雜職。而縣官視以爲要焉。自常工而跂之。亦曰遇矣。君諱智。晁弟四人。其次居二。娶楊氏。前卒一年。同穴樂村。二男。則同提舉與京山也。女適太常寺管勾李某。銘曰。五兵皆賊人。戰而恃以不殤。惟函爲扞焉。爾如君二十始傳。以及疾廢。爲之二十年。始日千被。被全一人。亦千人矣。其功亦豈微。孟子曰。函人惟恐傷人。由術推心。君亦仁哉。此其藏。

廣州懷集令劉君墓誌銘

大德戊戌。燧遊長沙。太原寓士劉致手所爲文。若將取正焉者。走何以荷之。讀之盡卷。賞其爲辭清拔宏豔。爲之不已。可進乎古人之域。旣又自狀其先人懷集令之出處。丐銘幽墟。感其心將昭明所生。爲敘之曰。君諱彥文。字子章。年二十八。筮仕。當中統三年。而知堂印。乃出管勾北京行省承發省廢而歸。授徒其

家將十五年。謂爲無意于世之事會者耶。當秦邸肇開。與故丞相阿爾公之行省長沙也。無不往干之。會同知堂印者許楫。爲憲長沙。言之丞相。丞相自省郎中故熟君。若晚君來。便宜版爲郴之錄事。羣盜竊發。無時芟夷未靖也。君不忍夷其俗。而苟簡于治。爲之四年。又三年。始官進義校尉廣之懷集令。羣盜恣張。虔人民。燔城郭。以冒天誅者。死無所忌。官軍少。不足爲恃。授鄉民兵。雜而殲之。格鬪屢衄。徙民保東山前。募民闢田入租私廩者。爲米八百石。一盡于餉增戍之兵。與遭寇之家。崎嶇艱梗炎瘴者四年。以至元二十六年四月三十日。而竟卒。是何宦之不達耶。今卑官無要知堂印者。去丞相尋丈。儼立案前。護守終日。不食須去。晨而出。暮而歸。日必再至丞相家。丞相出。收入奏。無不與偕。裕廟爲燕王日。當朝廣寒殿。君立庭下。問盞中何有。君則曰。堂印也。索而發封玩之。其親接如何。其榮如何。遇也如何。皆他人取將相之資也。一旦管句北京行省。去丞相千里。錄事於郴。西南北京又數千里。終乃令懷集于南海之濱。其不寢近而逾遠者。世恐無君匹也。豈讀書一過。千百言不忘。力兼人。射命中。皆文武器略足以表見一時者。有是賢人。已不凌人。人則忤之耶。且求以馴物。置干將鉛刀其前。蒙稚猶知後鈍而用銛。及論取士。則以方者爲徒足持已。而圓者始周乎物。故率棄明炳勁特者。爲不易馴使。而顧錄含荏弱而不自持者。爲善適俗而賢之。君豈坐是也耶。其邵子所謂陽在陰中。陽逆行時之爲也。故平生之道。刑家則多。其功于政者。僅此。譬水在山。束于溪壑崖谷之險。不得奔放平衍。爲澮爲川。其溉潤不博者。亦勢然哉。君石州寧鄉人。權殯長沙佛宇。文有玉亭小稟。祖開。參元帥府軍謀。考汝欽。妣馮氏。郡君李氏。三子。致某某。二女。歸李氏。薛

氏銘曰

士久其窮。觀守之篤。吏極其遠。試治之勛。且中其年。而卑其祿。皆彼蒼者。陰厚其蓄。抑不信之。以昌爾續。

牧庵集卷二十九

墓誌銘

雷君伯靜甫墓誌銘

昔者嘗徵先師魯齋至關輔。關輔學者。則而化之。始踐修人倫日用之實。不變于流俗之駭議。斷斷乎以復古自負。能久于其道。不數人而伯靜甫其一也。然伯靜不及事先師。事今昭文大學士潛齋楊公。最稱善學。而潛齋亦先師視之若友者也。先師晚聞伯靜名。嘗書示進學之要。嗚呼。觀兩公之知與。亦可概見其爲人矣。伯靜諱復。始字國明。由避家諱。改今字。生以歲丁酉。冬十二月二十一日。在幼稚。舉動如成人。父知事君。已有譽曰。是大吾家兒也。長知讀書。不輟朝夕。寒暑。君戒其耽苦爲疾。雖暫休之。而勤益力。不得則思。有聞斯行。經史諸子。積貫淹洽。講磨朋友。長善救失。敬以下之。雖不已若。不敢自餘。與人汎接。周愛。不爲町畦。惟嚴于擇友。事君承顏悅心。曲極孝敬。一不甘味。或終日自咎廢食。喪母。情文不便。今俗之簡失易行。一以禮經爲師。哀毀摧杖。始能興。日至君側。則變色爲舒。以安其靈傷心也。友五弟。豫世忠恆益。觀甚篤。然教誘之際。凜乎若嚴師莅側。晨省。各授事出。出還。必究先輩誰見。何得何問。遲歸。則候之門。疾則親護視。娣姒畫聚一堂。不得還私室。均勞同食。故久益睦。無間言。閨門之中。翦然有法。不幸以至元丙子夏五月八日卒。且卒。謂弟若子曰。吾願棄大人使哭子耶。吾目不瞑下土也。汝盡孝終養之。其友

徵士蕭嶠哭之曰。嗚呼。若伯靜者。以夷曠淵默之資。醇正精微之學。篤信允蹈之力。道被其身。教行其庭。使出而遇。必爲知務識治之臣。振德蜚聲。以利澤一世。若不難爲也。而其成其施已此。竟不淑耶。燧讀之。旣悲伯靜之不年。大徵士之善言德行。且知言也。按雷氏同之邵陽人。後徙河中府之河東縣陶邑。鄉者八世。曾祖希齊。不仕。祖震通。太傅濮府經歷。父守義。太傅濮府知事。由妣夫人趙卒。不反葬陶邑。特塋安西之咸寧白鹿鄉平里。故從葬平里塋左。妻侯。無子。後以弟豫子適。今亦卒。銘曰。

義理之在人心者。固未嘗泯。然非先覺之賢。卓識之士。唱而鳴之。學者安遽能知爲帝降之衷。民秉之彝。而踐行乎人倫日用之間哉。古之人。聞而知之。于百世下。猶若得其心傳。矧伯靜甫與先師魯齋。其師潛齋。生並世。或親承面命。而得其緒論者乎。斯文修塗。發軔未半。而車亡其軸。噫。此古之人。重發不幸類之之歎也。然君平日束弟若子。師之至矣。彼不哀君之未究其躬。而忍輟心夙聞家學于其身。反是思之。伯靜又奚以憾爲也。白鹿之原。平里之阡。左蔽蓬顆之妻綿。而高可隱者。下惟其埏。噫乎哉。斯賢。噫乎哉。斯賢。

瀏陽縣尉閻君墓誌銘

閻宏少燧十七年。識之七年矣。走未嘗遇。以凡士。宏亦願遊吾門。彙所述焉。始託銘其祖醫隱君墓。于時尉瀏陽考府君不恙也。今焉六年。又求銘其墓。嗚呼。何兩君皆不及知。而幸褻潛德其幽。宏豈有見走文。可以信後世然歟。走不讓爲者。則以答其爲好私余故也。君諱鼎吉。字和卿。醫隱長子。其鄉其世。其遷徙。

與醫隱所以教者。皆見先誌。以至元二十一年。尉瀏陽。二十六年。受代。三十年秋七月十七日。卒。年六十八。僑墓長沙。元配姚氏。再配白氏。二子。宏掾省江西興蕃也。四女。一適郡人徒單全。一適南陽高舉。二在室。孫男女三人。宏將以明年五月庚寅歸葬其鄉先塋。自狀曰。君幼耽誦。既敏爲文辭。異其時他門兒者。皆其小德。削不致詳。而日勤于筆錄。如易正義。論語注。漢紀傳。舊唐傳。治鑑節文選。杜詩註。十餘書。無慮數百萬言。具藏吾家。手澤尙新。可以汗車牛。未聞人有辦爲者。與學仕事人。則從張公邦彥。宣撫天平。爲四川行樞密院柴楨照磨。用禮卿王博文薦。出宜瀏陽。非賢不卽。與居母申憂。廬墓毀悴。杖而後起。皆出處不苟。倫理至篤者。又曰。君胸中廓廓無城府。商古今人物。成敗賢不肖。必當其實。諫友過。不計嫌怨。盡我責善。樽俎之容。粹如不流。爲詩千餘篇。號訥齋。以宏信愛。必不誣親。燧取筆之曰。君喟然吾少厲志嗜學。官止一尉。殆天戲人者。則不可也。亦思尉爲君行道資乎。蓋尉有難爲。有利爲。江南大縣。戶動十萬。一尉兵額。止于數十。而押綱衛使。恆抽其半。又其身有疾。疾喪婚之請。其直司日不盈三二十輩。盜逐不得。必尉焉罪。小則輟祿。大而奪官。是不諒其力少。不足以制姦。而惟責其專印不職也。是其所難。凡尉一世同者。而君有獨焉。在令尉恆居縣禦寇。無敢他遣。而湖省犯法臣。特遣數千里。送所市紗羅京師。賦出非其口也。入納非其手也。市者顧不必送。而顧必令不遣者。送之有司。又大其尺度。重其鈞權。從而責其輕短。不使得歸取償有司。必舉息立輸。又遭例大鉤考。無問其當與否。迫令首受治民閒遺楮緡二千五百。其家府。又遣修航海戰艦。欽廉人難其一。君難其三。此其所由以貧也。其利爲者。必求爲盜。罪不抵死。嘗

墨其肌肉。呈身有司者。署使伺盜曰。蛇之所塗。蛇能知之。吾使過耳。口不言所指。使自喻之。彼方困拘罪籍。一朝得交平民出入。惟求圖報。雖身爲盜。將不避爲。況囊橐他盜。願指富室。惟所便取。坐受其有。盜得其粗。我得其細。擇世所共寶。不可形迹敗者。歸之尉。有司覈盜不得。依日月則杖尉兵。一杖加一等。三杖而止耳。伺盜特尉權一時宜。密置無迹。何及焉。尉所輟祿幾何。而伺盜資之。什伯不貲也。盜爲伺盜。忠臣伺盜爲尉忠臣。又其巧者。與鄰尉交歡。私要言曰。吾得盜。必使誣汝縣富室。曰嘗巢窟焉。曰屢資給焉。幸羅之獄。足吾欲。縱之。民惟知德吾耳。汝得盜。亦如是取償吾縣。易地爲之。胥相益也。其月縱兵歸。詭代家人。責入傭直。與民以兵備斂者。又所得爲也。凡是數事。今之尉者。十出其半。又聞一尉始至。子嘗偕衣尉兵。其無可知也。比滿積楮緡十五萬。歲人稻萬石。而不知何術取之也。或曰。是由賊不急其期日。民貸其家。責券數月。子與母倅。無則入其田屋。今埒封君。不思仕矣。嗚呼尉乎。禦盜歟。師盜歟。凡觀夫人。觸法律行。徼倖未露。悻人大語。則君掩耳。此倫拘拘格格。自靖其道。不少萌憂不足。休休吾心。賢何如也。是爲銘。

奉議大夫廣州治中閻君墓誌銘

至大改元之明年。燧以學士承旨翰林。閻氏子然。來自江西。拜且泣。言先人嘗以公金石之文。獨高當代。故求曾王父醫隱君。王父尉潭之瀏陽君。與外王父金童子進士秦君道隆之墓。不于時人。三皆訪公。然不天。思可銘先人墓者。敢越先志。他求人哉。敢泣血請。余感其言而序之。君之先。始家蒙之漆園。入金。由其五世祖遵。卒令陳之宛邱。子仲。徙西華。再徙涓川。生肇。自是而下。再世則醫隱君瑀。與瀏陽君鼎吉。生

君諱宏字子濟弱不好弄而嗜學母氏歸寧亦挾書以從不暫廢誦鄉鄰異之成童嘗爲冬庠于農隙得束修皆用資已事師聞士子有聲望他郡者不遠數百里徒往致拜就正而知君莫如余先至元戊子辭直翰林客鄧君方壻南陽醫學提舉劉君大亨亦家鄧始以其文爲贊相過甚殷余旣以所得文法告之及示其所注遺山集余則曰子有進道之資而弊參天地贊化育精神于此耶斯與箋爾雅蟲魚奚異恐以是小知妨大受也君亦不以余言爲逆其聽而止歸覲瀏陽時故翰林承旨徐公琰持憲長沙手所爲文以先徐公奇之答詩以譽及參江西省政引以爲掾事資其謀拔士子有學者進爲校官會故翰林承旨瓠山王公構調廣選于江西省臣以君晨夕給事元貞之元詔修世祖實錄士在外可與修者聽其召入瓠山爲侍講用其薦爲國史院編修官將仕郎凡是二百七十一之帙籤皆其所書滿考進應奉翰林文字官徵仕郎同知制誥兼國史院編修上言中書請加左丞崔斌封諡以雪盜殺臣讎其忠讜之誣時相多之選掾中書君不可改承事郎出檢校江西省列曹諸掾簿書稽緩違失皆聽以疏其事達省受罰人無尤者會朝廷遣宣撫四道分行天下郡國功罪皆聽升黜今參河南省政陳公某至江西雅知君引以自佐君言貪賊固可汰苟其人初未之知子孫家人爲之持憲諸臣必其服者亦宜哀而伸之使不廢棄終身清白固足尙然亦有矯俗僥倖以干名者未可遽以爲信不覈其實而受其罔此邵子所以見善未嘗急去也陳公大然之由事比他道處事皆輕平無怨家赴愬于朝者大德乙巳余參江西省政君猶檢校見其夏去矜需多識敦信義理之學反躬而篤其行溫然大雅君子然後自驗嚮所期有進道資

言不失也。余以明年九月以疾辭去。又明年當十年五月十有一日。而君卒豫章寓舍。年五十二。貧無以殯。今平章議樞密事李世安罷左丞。休于家。買棺藁藏郭東門外。又明年官奉議大夫廣州路治中之制。下人一歎其不及拜命于生。一復華其賁九原也。平生不妄笑言。風度凝遠。望而知其爲有諸中者。遇士君子家法書名畫與古彝銘款。與一言一行之善。莫不筆之。雖家空匱。人或問之。揆義而取。不苟其得。其達己者。終身不忘。容齋卒東平。訃聞。君以其爲江西日。嘗新徐孺子祠。故卽是地爲位。立敍其情以哭之。又圖其像求余爲贊。歲時以事爲翰林日。其僕健而才。孤山愛其任事當意。遂借役之。終出檢校。不忍發口召還。竟死其家。與人交。不以合己而翕翕炎于始。不以逆己而悻悻叛于終。若泛愛然。心所與者。視其窮約。極其力可至以周之。洛人王君卿五十生子。而妻死。謀求乳婦。困于無貲。從求貸假。遂質象笏以應。其須子幸不夭。讀法上章。寧用槐板。其友楊行簡贖以見歸。友人劉景溫孝而貧。事老母。凡百爲皆身之。爲買妾以給役使。其急赴義多此類。曾祖妣某氏。祖妣某氏。妣姚氏。君則其出繼妣白氏。妻秦氏。繼劉氏。二子。然以治中恩澤。尉龍興之新建。江西憲臣多其好學而文。顧遣逐盜。用違其長。以職官召爲屬吏。季遷男孫址。嗚呼。太史公傳夷齊哀其餓死西山。引顏淵屢空糟糠不厭。而卒蚤夭。盜跖日殺不辜。肝人之肉。竟以壽終。以明天道無親。常與人善之。非然。蓋天道遠。人以數十寒暑之身。不要其歸。固宜云爾。必如周太史箴陳公子完。非此其身。在其子孫。驗于五世昌爲正卿。八世莫與之京者。始不膠于一定。姑置夷齊。顏子雖夭。當世配饗孔子。至今諸孫五十餘代。猶蒙其澤。復無所與。盜跖柳下惠弟也。安知其子孫不

一再世而微絕。其柳氏賢而傳之史者。又安知非下惠裔邪。路古以求惟微。而家宛邱而下。三世不仕。積將百年。尉瀏陽。秩纔九品。視古一命。顯而未著。至君之身。操觚牘于蠻坡。近負從橐。爲天子私人。出又檢校江右之省。月旦爲清議所歸。顯方著矣。僅踰知命而卒。明年而治中五品之制下。實古五命。雖未嘗一展驥尾。其恩澤猶及子然。視其王父。尉若異地。爲職則鈞。王父已是。然猶進未艾也。其大震耀。非然之身。在其子孫者。人亦孰得而必其世哉。由是以思。天道無親。常與善人。信也非歟。是爲銘。

南京路醫學教授李君墓誌銘

君李姓。諱綱。字文紀。其先真定人。祖安道。以字行。考諱顯榮。金廣威將軍。內鄉酒使。歲壬辰。桓山公武仙聞可。將任置爲千夫長。使戰浙川。蓋當太上皇由興元循漢東出兵也。君年方十二。以孝聞。學能詩矣。會鄧之節度使耶律瑗盡以州民降宋。君侍母郝至襄陽。制閫皆處之屬城。分君隨州。明年還鄧。乙未歲饑。以皇子庫庫齊教徙洛之西。君以儒業醫。故思到精詣。爲人診治。疾輒已。雖先輩善其術。久其道者。君不以年少下之人。亦捨彼不卽。而惟君歸也。年二十四。或云廣威君不亡。嘗見之雲中。跣足往求。不獲。無有也。號歸失明。乃籲天自悼曰。吾壯而爲世棄人。如母氏之老何。于是將身克慎。政治益力。蓋三年而視復故。中統元年。制授南京路醫學教授。至二十一年。改襄陽醫學教授。尋詔尙醫。今本草中土物。且遺闕多。又略無四方之藥。宜徧徵天下醫師。夙學多聞者。議板增入。君在徵中。三以老丐。不就車。二十六年。歲己丑。夏六月三日。年六十九。卒。鄧越五日。葬穰縣亭子坡。嗚呼。人倫之大。莫先能子。有是一者。則天下萬善。

可必其畢集吾躬。推是言之。則君處己之慈祥恭儉。與人之忱信和厚者。孝基之也。六子友直友諒友聞。友端友德友誠。恪服訓言。近奉晨夕。遠職官守。皆馴馴有修謹稱。其化家又何如也。諒前將仕郎提舉靜江府茶鹽。聞前奉訓大夫知壽昌府君不恙時。四方達官賢士。有過此者。或識不識。必造其廬。州縣牧宰。旬存而月問之。亦此邦之雅望君子。獨與燧相能。方疾委篤。猶遣端也求書獲安。將揭其寢。尙冀其可速已。會燧疾。不親筆硯。不果。而竟已此。哀哉。娶金徵仕郎化平令胡士元女。六子同出。前君卒三月。女二人。一適張升。一適提領常德路交鈔張居敬。男孫五人。未名。女六人。幼。誠也。綴杖致諸兄命。哭請銘。乃泣系之銘曰。

維古中壽七十率。有宰物者司入出。偶于君年不足一子。而全歸始曰卒。善遺後人昌。後必。魂神徂升降。體質其千斯年安此室。

趙君和父墓誌銘

至元十六年。燧先嬪關西夫子紫陽翁楊公奐之中女卒。禮。夫爲服齊衰杖期。然必三年而後娶。達子志也。十八年。燧時爲秦憲。聞同之士子趙君和父中女。年二十有四。由嚴於擇對。在室通書聘之。君乃聚其族謀曰。使君以故中書左轄公猶子。願肯求結褵吾門。是其心非求婦氏閨閤。哀選姿顏者。第不欲以失節者匹其身。其志已絕出庸人。誠可嗣爲兄弟者。禮辭卽許。燧以不腆先君之幣迎之。已婚。往拜其門。君以外舅自居。若視其壻爲清門子。非其耦者。乃大副所願。自慶得良婦。翁從其鄉來長安。聚居踰月。其年

十二月，翁歸。兩未虞，竟自是爲死生訣也。明年壬午，以十一月二日卒，露井社其家。年止四十九。計至燧與妻蘋，自長安三百里，各服子壻女服往哭之。以其月十六日，舉納之。其鄉先塋壬舍來會葬者，或遠數百里。老者哭之，如失子弟；少者哭之，如喪父兄。自其居至墓所十里，祭不絕路。或曰：嗚呼哉！天乎！若人之年耶？如是者盈千人。匹夫可以化其鄉，未見有如斯比者。夫豈無自然耶？君諱居中，字和父，厥考彥和，鄉人誅爲明理先生。祖考惟良，曾祖考師肱，高祖考孚，自君而上，八世醫行其鄉，不徙業。又自祖考而下，三世兼業儒，以醫及人，以儒修己。人益誦一鄉之善士。君之爲尤事明理，以孝有譽。友其弟居仁及馬氏，妹逾篤。豈惟疾者藁然來歸？鄉人有爲不善者，必訓飭之。聞者受言，不敢岸傲，拂拒之有訟，不之府縣而求司直其家。取醫直集穀，常千斛。歲歉，則貸之貧，無積者。凡哭而哀者，皆常飲惠。食德人也。妻鄧，相敬如賓。三十餘年，無反目言。一子惟義。君卒之年，甫再歲。四女長歸同里楊某，次歸燧，次歸韓獻，幼在室。後卒之六年，當至元二十四年戊子。外姑氏謂燧曰：乃外舅汝知已也。汝不哀其窮而在下，生志不遂乎？汝直翰林職史館，銘賢公卿墓者夥矣，可不有言發其幽窟潛輝乎？不然，則平生修爲之勤，愈不聞將來矣。燧敬應之。銘曰：

生不五十，孰謂其年耶？業仁冒其鄉，道行其室，冀缺之賢耶？子稚而氣質粹實，或幸賴以爲傳耶？十一世之蹟，迺今猶然耶？彼不絕夫涓涓之滴，將待夫他日之爲淵耶？其爲世所甚惜者，又烏知夫有在天耶？嗚呼！吾銘之幽石，其可以告夫邈綿也非耶？

故民鍾五六君墓銘

緊鍾徙吉潁川。自迫於靖康。釋騷避吉。而來岳世方四。由元而富。仕明至。實生文興叔進字。郎行五六。以族次。凡是四世。皆不位。吁哉五六。遜迹市。乃如天啓所狀事。居家孝謹。文縝緻。嚴訓厥子。俾知義。自奉殊貶。忘勤勤。基約以極。豐其積。此邦師之陶猗視。居鄉侃侃。和以易。不私其有。善分施。歲荒民饑。閔瘠瘁。發我廩庾。飫老稚。崩梁壤塗。撻石治。至今行者。賴其利。乙丑之閏月庚出。年六十八。世廼棄。葬之三陽先墟。比黃室之子南秀嗣。南英南金又其季。一女結褵。未決議。男孫滿十女半。是一庭。變兮貫魚似。椒聊蕃升。必天意。豈悌之家。久踣躓。一朝起行。當遐致。況如南秀士服被下。及二季皆學仕。始卑終高。若登陞。或者而宗由昌熾。匍匐哀求。銘以誌。伊誰成厥孝子志。苟有善兮。必門地。漢氏仲山。凡豈異。奮筆發隱。太史燧。臨江路總管府判官夏君母夫人張氏墓誌銘

大德十有一年秋八月。臨江路總管府判官夏元亨。過燧于鄆。拜而言曰。元亨母。汝陽張氏世家也。是家金以友義。嘗旌其門。至居士某者。百有八年。以終三男二女。夫人其姊。吾夏氏與同里。生十九年。而歸先人。後徙家洛。祖府君諱某。金尙醫。年九十餘。妣朱年八十餘。以終。于時無他戚。獲躬服勞以養。姻里孝稱之。尙醫不恙時。每訓先人。汝未盡讀吾書。而得吾術。其無爲醫師。以誤人。授汝祕方。爲瘍醫。自業。先人守是言。及四子天瑞。元亨。與利貞。德常生。教之讀書。元亨長矣。責使學仕。曰。汝欲事人。必親其大。一世者。乃遣宿衛皇孫邸妃。今皇太后。積勤百年。敕提舉龍興茶局。歲貢名。葬其邸。大德六年。調令臨江。將上。其年

十二月七日先人卒。年八十有九。人曰：天者獨鍾壽考于之二家耶？既窆，偃師某鄉獨輦夫人來南，有公相與祿以慈旨，甘爲醪醴。歲時晨夕，歌舞爲壽，而歡其心。八年，當婦郝卒之明年，夫人已爲納幣趙矣。急其婚期，元亨欲俟三月終某杖期，求日。夫人則曰：吾得吉矣。竟以八月三日合卺。纔六日，其日浴已。又沐已，又易衣。家人問其然，曰：吾所欲也。明旦，元亨奉檄祠閣阜山，未至而追者及之，以卒告。其月九日也。年七十有八，殯而待其滿秩。舟柩其返葬于洛，亦嘗揆之。順章貢彭蠡大江，以溯淮達汴。陸去洛纔十五舍，爲便且邇。所以由石鍾山溯江漢，餘二千里，以至此。又去此而襄，陸行千里，始至吾洛，不敢以爲迂遠，必公見者，以公鄉先生。文有時譽。昔參江西省政，嘗書薦其臨江忠愍廉平爲知己。恃此如得銘先妣幽墟以歸，則生與死者，華賜均及。燧哀之曰：嗚呼！使如汝言，終杖期郝婦于數日，則夫人爲不及饗趙婦。且古治喪絕而後沐浴而襲，今不疾沐浴者，猶人之常。隨以易衣若襲然。明日遂終。由前則行嘉禮于喪，由後則豫死事于生，豈逆知其將然，不以語之人乎？抑初未之知，或天者誘之，俾其然也。所可甚惜，太后正位東朝，其澤必先丐其舊臣，則元亨亦依日月末光者，其榮以祿將大于今。夫人不及見之，其將歆其豐祀乎？天瑞道之營道令，未上而卒。利貞龍興提舉，德常醫學正，男孫三人，男曾孫如干人。銘曰：事耄姑翁，負孝稱其躬。有子序鴻，皆婦夏之功。天報之豐，俾食子祿以終。歸而君子之穴與同，于洛邑天地之中，可謂世所感者無其恫矣。

牧庵集卷三十

傳

太華真隱褚君傳

雲臺真隱褚君。幼業儒。長而遭時艱。求所以託焉而逃者。寄迹老子法中。受學劉真。常栖遲不在城邑。多名山中。如保之葛洪。琅邪之七峰。應之嶽神。無常居焉。後由真常主華陰之雲臺宮。始從之西。真常逝而徙上方。留弟子主雲臺。雲臺華嶽也。爲山益奇。上方又天下之絕險。自北望之。石壁切雲霄。峻峭正矗。非恃鐵絙。不得緣陞。上下又不知鐵絙成於何代何人。意者古能險之聖也。將至其顛。下臨壑谷。深數里。盲煙幕翳其中。非神完氣勁。鮮不視眩而魄震。君負食上下自給。如由室適奧。嬉然不爲艱。薄寒則上下負食益勤。爲禦冬備。一歲偶未集。冰雪塞山門。計靡纔得當冬之半。始服氣減食爲胎息。遠則數日一炊。明年山門閉。弟子往哭求其尸。見步履話言。不衰他時。方神其爲非庸人同。下山止之曰。不可復有往也已。設向師食不繼。僵死冰雪。弟子雖有喙。何說自白其能孝於天下。必勿復往也已。君難逆其請。指牛心谷曰。此漢太尉楊公震授徒之槐市也。或聞而稽疑其傳止。得公常教授。胡不見其居華陰者。不識君何據。曰。然。谷南直中方。入行二里許。深林奇石。泉濺濺鳴。其下墜地盈畝。構室延袤不足尋丈。環蒔佳花美箭。人之來者。始則愛其蕭爽。不自知置身塵埃之外。居不昃晷。旣已欠伸弛然而思去矣。君又屏弟子獨居。

或勸宜留一人自佐。曰：吾居此樂，彼居此戚，所安先不同，猶彊而留之，能施期月之外，要終相棄去。吾故與之爲約，非春糧採薪不至，絕而繼具而去，亦古之君子以人望人不竭忠也。其出山還雲臺，必以水冰，無所仰飲。十月爲候，二月還谷，性嗜讀書，逾熟左氏博議，日食數脩，飲酒未醺而止，不盡醉也。人家得名酒，爭攜餉之。至則沈罍泉中，時依林坐石，引瓢獨酌，日入則入室而休，或坐罷寢覺，起行庭中，一夕如聞林閒行聲，戛戛，君則曰：獸也，雖不得其名，可試而知。引石投之曰：麋鹿哉！將驚而奔，或止而不去者，虎耳果止聽不去。明旦視樊垣外虎迹縱橫，再夜起行如前夕，不以自戒而止。聞而談者，神明之亦有他士樵人獵夫之適山，初未聞君爲執何人，責之具炊，寢則假榻，甚者易而詬之，隨之益勤以安，無難色，忿言其外，若職宜然者去。或問姓名，惟他語不告。終問之，則曰：吾求人知耶？必求人知，而求若知耶？吾居此，在人所不問，而吾所不告也。人見其苦身不近人情如是，然不違俗，上自王公而下及臺阜，爭以一際顏色爲快，燧亦嘗再遣廬焉，告以人閒聲利，泛如秋風之過耳，噤不酬應。叩之山間爲樂何如？必盡舉平生所見好石幽樹，佳泉危棧，膏膏忘罷。若幸夫人之一往，而我能先之者，相送以出，覺胸臆塵鄙如雪之見現，消釋無留餘者。數日，益信夫遊方之外，有恬愉靜退之士如君者，罕類例求也。君名志見，字伯達，名聞天聰，俾禱有應，不爲疹，賜號佑德真人，提點嶽祠瀕靈宮，又以嶽祠風雨將霽，內出鈔萬八千緡爲完葺，費三千易敝而新，飾漣爲疊，過者改觀，始知有應務之才，特韜之耳。年八十得益深，聞益彰，聖皇思見益急，當歲己卯，至元十六年，詔中使起之，北面受命，稽首曰：草莽之臣，通也，自知審矣。疇昔壯也，言不足以資廊

廟擇力不足以疆禦。侮今老矣。先狗馬填壑。晨夕至蒙。冒龍光力疾以行。終不達。恐傷陛下仁及草木之化。是以昧死請。中使竟虛車而返。今李大參公號知君深。且樂誦人善者。戒燧傳之。無俾不聞於今。而泯於後焉。公名德輝。字仲實。前北京等路行中書省。今以中奉大夫出相安西府云。

行狀

中書左丞李忠宣公行狀

公諱德輝。字仲實。世居通之潞縣。曾祖某。祖全。再世不仕。考朴。尚書吏部主事。妣宗夫人。三子。長德英。次德芬。李公吏部君生。三十九年。且卒。指公謂宗夫人曰。吾爲吏治獄。不任悍驚刻削。人蒙吾力。脫罪。吾齒平民者衆。天或報施善人。是兒其大吾門者。勿憂貧且賤。公方五歲。哭之如成人。家纔儲五升菽。夫人舂蓬稗爲糧。芼藜苳爲菹。活之荒歲。既就外傳。嗜讀書。束於貧。無以自資。輟業十六。監酒豐州。祿食先足。旨甘有餘。則市筆札。錄書夜誦不休。夫人以過耽苦。慮傷其孱薄也。爲滅燭止之。已乃厭糟麴。歎曰。志士顧安此也耶。仕不足以匡君福民。隱不足以歡親善身。兩閒之閒。人壽幾何。烏可無或有聞。死同腐草木也。絕少年輩不游召。其所親與。率一時名公碩儒。歲丁未。用故太傅劉文貞公秉忠薦。徵至潛藩。俾侍今皇太子講讀。薦故翰林侍讀學士竇默。故宣撫司參議智迂賢。皆就徵。癸丑。先朝封周親。割京兆隸潛藩。擇庭臣可理賦者。使調軍食。實出公從宜。使辟故眞州總管高逸民自佐。時汪忠烈公始宿兵利州。扼四川。

衿喉。規進取數萬之師。仰哺於公。乃募民入粟。綿竹散幣集之。或給鹽券。使歸京兆受直。陸輓興元。水漕嘉陵一年。而錢粟充棟於軍中。宋臣余玠議棄平土。卽雲頂運山大。獲得漢白帝釣魚青居苦竹築壘。移成都蓬閣。洋夔合順。慶隆慶八府州治其上。號爲八柱。不戰而自守矣。蹙蜀之本。實張於斯。丁巳。深峻用事臣大集關西河南諸臣入計局。以中書爲潛藩用者。文致多方。於公獨無絲髮得己。未從南征。至鄆。留後行營。庚申。以爲南京經略使。再月。又以爲北京宣慰使。其年。皇帝卽位。中統改元五月。又以爲燕京宣撫使。燕多劇賊。造私幣。雜糴行民間。陰結死友。相誓復仇。怨殺人。公悉捕誅之。雖中書開府在燕。令行禁止。多不上白。由是忤時相意。以誣去位。從北征還。守北山。諸關三年。惡已相反。誅以爲山西宣慰使。罪權勢之籍民爲奴。免而良者。將千人。至元改元。罷宣慰司。授公嘉議大夫。太原路總管兼府尹。至是潛藩故臣相。無有出爲二千石吏者。上以太原難治。故留居此。會我先左丞公當分省遷調山西。湖東世職守令。卽遣諭旨。公拜稽首曰。陛下以臣堪一縣。俾爲令。臣烏乎可擇。況以千里寄治。非材大懼。任使不稱。以傷陛下之明。敢薄之耶。自爾愈益勤勵。崇學校以明人倫。表孝節以勵風俗。逐姦賊以剔民賊。裁婚葬俾師簡儉。敦耕桑以富生理之出。立社倉以虞水旱之歉。一權度以絕欺詐之攘。嚴鼓柝以警奇袤之覬。凡可與民漸靡仁義者。無弛不張。嘉禾瑞麥六出其境。滿秩。左部差功最天下。右部考過。惟草竊盜不獲一人。五年。徵入爲右三部尙書。人有由訟財而失其兄子者。公曰。何疑焉。叔殺之也。深竟其獄。公所信厚。及權貴言可撼公者。莫不請求保爲衣冠之族。無有是也。皆漫不爲應。懸己俸爲賞購之。其家人果上變告情。

狀呈露言者。愍服叔竟以是病死。俄轉戶部尙書。事無大小必決之一日。書判煩勞。指爲之蠶。七年會上。以蝗旱爲憂。俾錄山西河東囚。行至懷仁。民有魏氏。發得木偶。持告其妻挾左道。厭勝謀殺。已經數獄。服詞皆具。自以爲不冤。公燭其誣。召鞠其妾。榜掠一加。服不移晷。蓋妬其女君。謂獨陷以是罪。可殺之也。卽直其妻。而杖其夫之溺愛受欺。當妾死罪。觀者神之。或咨賞泣下。八年。授中奉大夫。參知北京。行尙書省事。九年。能尙書省。以故官參知北京。行中書省事。京南水歲泛溢。至城下爲患。公築堤捍去。皇子安西王有土關中之明年。當十一年。奏求公輔己。以故官改安西王相。至則視瀕涇。營牧故地。可得數千頃。起廬舍。疏溝澮。其中假牛種田具。賦予貧民二千家屯田。最一歲入得粟麥石十萬。芻藁束百萬。公是來也。貧不能從妻子。留之京師。事或上聞。賜錢二千緡遣之。明年。詔以王相撫蜀。其年重慶猶城守。東西川各開樞府。合兵數萬人圍之。公至成都。兩府爭遣使咨受兵食方略。公危語動之曰。宋今旣亡。重慶以巨壁之地。不降何歸。正以公輩利其剽殺。不得有子女。懼而不來耳。不然。他日兵未嘗戰。及招討畢。某偕中使奉璽書來赦。最宜正言明告。嚴備止攻。以須其至。反購得軍吏杖之。爲僞得罪。懷之入降。水陸之師。雷鼓繼進。實堅其不下也。中使不喻詐計。竟以不奉明詔反命。如是者。皆公輩玩寇疆場。心迹之著白者。況復軍政不一。相訾紛紛。朝夕敗矣。豈能必成功爲哉。兩府多致金帛子女爲謝。曰。戎捷與人。法令所不禁也。公讓不受。出未至秦。瀘州畔而重慶圍果潰。再退守瀘州。十三年秋也。明年。詔以巴哈與公代爲西川副樞。公兼王相。大軍旣發。公留成都供億。食纔支半月。賦粟繼之。官船不足。括商民船千艘。日夜督運。其年復

瀘州十五年重慶之圍再合。踰月卽下。紹興南平夔施思播諸山壁水柵隨之皆下。而東樞府猶故將也。懲前與西川相觀望。致敗惡相屬。願獨軍圍合州。初公撫蜀。徑東川歸。以爲重慶帥闔受圍。必徵諸屬州兵。盡銳拒守合州。宜虛誠使諜人持書曉之。兵隨其後。亦制合一奇也。卽出合俘繫順慶獄者。縱之。使歸語州將張珪。以天子威德遠布。宋室淪亡。三宮皆北。又頌聖量含宏。錄功忘過。能早自歸。必取將相與夏呂比。又爲書反覆禮義禍福。譬解其言。以爲均爲臣也。不親於其子孫。合之爲州。不大於宋之天下。子孫舉天下而歸我。其臣顧偃然負阻窮山。而曰吾忠於所事。不亦甚惑乎。昔也此州人不自爲謀。求去就者。以國有主。寧死不欲身被不義之名。故爾得制其死命。主今亡。猶欲以是行之。則戲下以盜賊遇君。竊若首以徼福。一旦不難也。其說累數千百言。又約書言爲檄。刊木於山。浮板於江。珪未及報。而公還王邸。至是合遣李興張邵十二人者。詞事成都。皆獲之。當斬。復爲書縱歸。使喻其將王立。其言如喻珪者。而益割切興至。立亦計夙與東府有深怨。懼誅復興等。導帥幹楊獬獲獵書。間至成都降。公從兵纔數百人赴之。東府害其來爭。有言前歲公爲書招珪。誠亦極矣。竟不見寤。無功而還。今立珪牙校也。習狙詐。不信人。特以計致公來。使與吾爭垂成之功。延命晷刻耳。未必定降。定降公冒吾圍而來受。何物視我。必不汝進。公曰。前歲合以重慶存。故力可以同惡。今也孤絕。窮而來歸。亦其勢然。吾非攘若功者。誠懼汝憤其後服。誣以嘗抗蹕先朝。利其剽奪。快心於屠城也。吾爲國活此民。豈計汝嫌怒爲哉。卽單舸濟江。薄城下。呼立出降。安集其民。而罷置其吏。立德之與金玉。飾少艾爲謝。公曰。若以吾爲是來耶。吾無事乎此。其持往餽之。

東府合人自立而下家繪事之川蜀平復以王相還邸是年王薨公感其受知深而悼夫棄國之蚤也哭之幾不能生十七年詔公與南省參政程某卽其地聽思播湖南所訟鎮遠王平田會西南夷羅氏鬼國叛別詔雲南湖南四川合兵三萬人誅之前茅及境矣公曰蠻夷無親爲俗吝貪始由邊將撫之失策積怨以叛好事之臣請加兵誅旁諸小夷洵懼相擅繼叛者必衆恐非直三萬人能歲月平也吾賴天子仁聖馳一介之使招之可坐俟其徠豈必煩兵不及以聞遣安珪止三道兵張孝思諭鬼國降其酋阿齊熟公名問曰是活合李公耶其人明信可恃卽日受命身至播州降語且泣曰吾屬百萬人非公惠活寧鬪死不降事畢驛聞上爲之開可改鬼國爲順元路以其弟阿哩爲宣撫使其年王相府罷十一月二十一日始至黃平是夜也星如斗實館垣外公弗善也歎曰他日嘗夢主烏江今播水適名烏江與是星皆吾死徵也夫吾嘗誦馬伏波老當益壯之言而奇曹武惠爲將不殺今得活羅鬼馬革裹尸歸何憾二十七日卒後七日資政大夫中書左丞安西行中書省之命下蠻夷望轎車爲位祭旦哭者動百千人塗所經男女空家咨嗟聚觀合之安撫使立衰經率吏民迎哭傾振山谷爲發百人護喪達興元上聞而悼之贈光祿大夫中書右丞諡忠宣公賜錢二千緡具葬先妃嗣王遣前僉書王相府事博囉賻錢五百緡具奠明年僉播州安撫司事何彥抗章請卽州治之東爲廟制曰可薨年六十二夫人胡氏前公卒今夫人某氏子一人嘉議大夫安西路總管兼府尹諸軍敖拉頰也女二人長適嘉議大夫禮部尙書劉秉恕幼在室嘗槩公平居以先夫人剛嚴其弟宗亨有小過對衆奮杖撻之不少惜公若何而歡奉使未嘗有厲色

遽言其亦能子哉。二兄既位不大耀於時。每分吾有。不至以寡乏見告。其盡禮姊氏。不以語人。人知爲姑。若從母。不以爲兄弟也。與人交。誠易炳白。不張城市機穽。不面爲許。退與他人語。必諄諄暴其所長。而韜其不及。至繩檢姦慝。奮發忿急。不能容其過。然亦不能留怨惡於胸中。雖舊欲擠己。入不測淵者。事已輒忘之。略無校言復意。自奉甚薄。有積則施之。不爲子孫他日計。西川副樞。上嘗賜以玉帶、錦衣、錢二千五百緡。止留其服物。餘悉分之親戚賓客。一日而盡。人間之。則曰。曩吾家多責券。縣官憐而賜償之。無負矣。吾貴而薄功。又可富而厚享耶。不思而兩有之。神不福人。幸以是人曰我貧。吾利器也。故自入官。非素所往來。有相答報者。未嘗恃形勢取一錢直餽。再爲尙書。權臣力能生殺人。恥公共事累年。足迹獨不及吾門。以薄祿用奢爲言。願奉母錢百金交歡。令取子自益。卻之。亦不爲謝。王相七年。及事先王五年。言必切切。臣職子道。請聞斯行。以絕事嫌。簡約侍衛。以裁浮費。無急土木。殫匱民力者。中外所厭誦。凡人賢而有聞。滿調將東歸。必薦汲之王。陞秩留之。故關輔得士爲多。皆視爲己職當然。未嘗語人由我而然。以期見德。遇事謹敏。好謀善問。多不自用。及其末路。生人之心愈切。取信蠻夷。聞其諭招。椎結荷旂。竭蹶慕義。三道之兵。爲之抑首。思徼利於萬里。羞成功於一介。賈星、烏江、馬革、包柩、斬木、通道、昇歸、要荒。抑嘗觀今中統以來。將相臣死。率於其家。天下之情。稱其平生所爲。功高者惜。德大者思。不過如是而極。然未有若公逢掖死事。爲世所壯者也。嗚呼賢哉。又嘗觀古君臣莫難于合。尤莫難于信。蓋合或可伺所欲以中。而信則必不可襲取于一時。自公始侍潛藩聖皇。非遽貴之地。亦嘗身接之面訓之。指受之。親以細微觀其

敬忽置之糾紛。試其理解。譬以雷霆察其變常。納之汙濁。驗其潔白。既久而後知遇也。其後三十三年之中。或使或牧。或從或留。或相或傳。諸侯王或將。凡賞勳勞。優耆舊。可以勸人臣者。公皆與爲之。至商論羣臣能否。于公不曰清。則曰剛。或曰不欺。不見有貶于聖訓。用未盡。年未耄。人猶未足其悲。受任于已。試知遇于既久。可與疇咨海內者。將不知誰在也。嗚呼悲哉。後三年。頰彙進遺事求狀公行。燧亦荷公知。且久遊其門。又與頰嘗同受學。義不得以不文爲讓。姑爲論次如此。

牧庵集卷三十一

經義

天地交泰后以財成天地之道輔相天地之宜

造化之奠位必合兩而成其和。聖人之成位必參兩以用其中。蓋和者致泰之極功。中者致和之大本也。徒知保合太和而氣化之流行者。固所以通乎兩閒之天地。乃不知允執厥中而道化之運行者。實有以位乎一身之天地。吾恐造化之中。有時而偏。則氣化之和。亦有時而息矣。聖人之宗主是泰。豈其然哉。且天秉陽而居上。確然其體也。而氣則下交乎地。地秉陰而居下。隤然其形也。而氣則上交乎天。氣化交感。網緼磅礴。至和流通。在在無閒。造化之泰。何其盛也。其必有致此者矣。曰有元后焉。天地之道。或太過也。而元后則以此之中而財成之。天地之宜。有不及也。而元后則以此之中而輔相之。道化潛通。無過不及。一中懋建。天地不忤。聖人之泰。不亦溥乎。合兩以致化者。造化之泰。此泰之蟠際也。參兩以贊化者。聖人之泰。此泰之宗主也。有聖人以宗主是泰。則成位乎上下者。無非中。而奠位乎上下者。無非和矣。泰之象云云。其意如此。嘗謂有致泰之實應。有致泰之實感。應者其驗。感者其本也。應者其流。感者其源也。應者其和。感者其中也。應者其在天地。感者其在聖人也。是故天地網緼萬物化醇。陰陽妙合萬物化生。天地固以和應矣。何應非感。天地設位。聖人成能。皇極茂建。雨暘時若。聖人固以中感矣。何感非應。應者非先。

感者非後。天地聖人蓋相爲因成爾。或者昧之。往往謂高明博厚。天地之體也。下降上騰。天地之氣也。體立而氣行。交通而旁達。則形和氣和。而天地之和應矣。于聖人奚賴焉。吁。是未知有感應之實理。相爲流通者矣。天地之化。而範圍者聖人也。天地化育。而參贊者聖人也。聖人者。擬天地而參諸身。以一身而贊化育。陰陽闔闢。我轉其機。寒暑推遷。我總其運。此精神之感召。和氣之流通。使之三光全而日月無薄蝕之虞。五紀協而風雨無淒苦之變。財之成之。輔之相之。而無過不及之偏。何莫非大中之感者。亦何莫非太和之應者。嗚呼。和在天地。則天地一聖人之應也。中在聖人。則聖人一天地之感也。要其所應。則太和所播。上際下蟠。無彼此也。無間斷也。天地之泰。天地之氣化。所由通也。而位天地。育萬物。元后之於天地。實有功焉。太過其財成之。不及其輔相之。以斯中也。致斯和也。氣化之和。卽道化之所由驗也。原其所感。則大中一建。萬物咸覩。無偏黨也。無反側也。聖人之泰。聖人之道化。所由通也。而亶聰明。作父母。天地之於元后。實有賴焉。寒暑其教化之日月。其順動之。以斯和也。驗斯中也。道化之中。卽氣化之所由基也。然則中和無二致。感應無二機。在天地者非有餘。在聖人者非不足。渾渾乎一中和之盛。此其所以爲泰治之極歟。今夫得氣之清。穹然而高。天之位固奠於上矣。得氣之濁。隤然而卑。地之位固奠於下矣。上下不相紊也。而有氣以行焉。兩者交合。二氣氤氲。天稟陽之清。而至陽赫赫。必下交乎地。地秉陰之濁。而至陰肅肅。必上交乎天。其未交也。則上下異位。交焉。則二氣薰蒸而成和。其未交也。則陰陽異質。交焉。則二氣流通而成泰。交斯和矣。和斯泰矣。將見協氣嘉生。薰爲太平。時和歲豐。百祥交致。天地固和矣。而萬物則

咸和天地固泰矣。而萬物則咸泰。甘露降。醴泉出。溢而爲和。氣之祥也。嘉禾生。芝草植。鬱而爲和。氣之應也。由此和而推之。其往來不窮。施生無方。其噓吸變化。無非此和之升降飛揚也。不然。則和氣一乖。天地否矣。非大易有取於乾坤交泰之象也。然成氣化之泰者在天地。而開道化之泰者在聖人。聖人者出父乾母坤。而藐然中處。則成位乎天地矣。大生廣生。而大寶曰位。則成能乎天地矣。聰明作元后也。而有道以運焉。兩儀同流。一中不踰。陰慘而陽舒。天地之道也。過則不能和。春生而秋斂。天地之宜也。不及不能和一。喜怒有同乎陰陽之慘舒。惟皇作極。而財成之。則無愆陽。無伏陰。而天地之道所由泰。一賞罰有同乎春秋之生殺。惟皇作極。而輔相之。則無暑雨。無祁寒。而天地之宜所由泰。協斯中矣。中斯泰矣。將見王道正直。蕩蕩平平。會其有極。是行是訓。吾之道。無非天地之道。吾之宜。無非天地之宜。鼓元氣。雷域中。天地之豫也。卽聖人之中也。騰百川。雨天下。天地之解也。卽聖人之中也。由此中而推之。其平秩平在。寅饒寅賓。其在璿璣玉衡。無非此中之彌綸曲成也。不然。則中道不立。天地否矣。非大易有取於財成輔相之義也。大抵有氣化之泰。有道化之泰。氣化之泰。一天地之和也。道化之泰。一聖人之中也。若不相關也。而實相因。若不相與也。而實相爲用。其殆一道氣之相爲貫通者乎。何者。有道斯有氣。道降而氣。其在天地。則爲陰陽之運。其在聖人。則爲中節之和。氣統於道。其在天地。則爲陰陽之粹。其在聖人。則爲未發之中。天地以氣運。則有上下交通之妙。氣卽道之流行焉耳。聖人以道運。則有財成輔相之功。道卽氣之主宰焉耳。融道氣。致中和。天地大造化也。聖人權造化也。天地聖人同一中和之泰也。使天地徒以氣化之泰。

奠位乎上下而不有聖人以道化之泰。成位乎其中則陰陽失其道。寒暑失其宜。日月失其經。和者流矣。其何泰也哉。抑嘗考泰之爲卦。而有疑焉。天尊地卑而乾坤以定。皇極建中而彝倫以敘。今而象泰之卦。則有取於乾下而坤上。元后之任。則有及於天地之道與宜。何也。蓋天地以形言。乾坤以氣言。天地奠位而乾下坤上者。氣也。天地之交。以氣而交。是之謂泰。乾坤其父母也。元后其宗子也。乾坤以氣化。而賦形賦色於元后。元后其可不存吾順事。而財成輔相之。以盡其宗子之職哉。是知乾下坤上。氣化以交而成和矣。而乾坤以定。則和者未有不中。曰道曰宜。元后財成輔相之以中矣。而彝倫攸敘。則中者未有不和。此其所以有取於泰之象歟。雖然。聖人之用中。其應在天地。其感在民心。民心罔中。惟爾之中。則人和而天時地利無不應矣。古之聖人。端居乎宥密之中。而尸財成輔相之職。豈必曰夏則致天地之陽氣而導行之。冬則閉藏之歟。又豈必曰秋則取天地之陰氣而施用之。春則閉止之歟。夫乖氣致異。和之反也。和氣致祥。泰之極也。禮樂所以合天地之化。中和所以致萬物之育。吾之於民。苟能以禮樂導其中和之教。以中和行其左右之道。則吾民之中。卽天地之中也。吾民之和。卽天地之和也。聖人象泰。以財成輔相之。任屬之聖人。而必以左右民繼。言之厥有旨矣。昔之言泰和者。必曰唐虞。則唐虞之時。地天交泰之時也。以言其治。則地平天成也。以言其道。則精一執中也。以言其化。則黎民於變也。中和之應。未有盛於此時也。然要其所以致中和。無非用中於民始之。作訛成易有其時。析因夷隲有其序。六府則孔修。三事則允治。彼其潛通天地之和。默造化之機。固有左右爾民之治存焉。如曰舍斯民而他有所謂財成輔相之。

事。特陰陽固閉之學。傳巫醫史之爲。堯舜其然乎。不然也。春秋以來。日蝕有書。地震有書。不雨又有書。是何陰陽繆戾如是耶。得非治不唐虞。世則春秋。大中之治不建。而太和之治不復乎。吁。是必有寤寐堯舜於千百載之上。而爲天地立極。爲萬世開太平者。

名字說

李綸字說

李明之。以其子讓來見。曰。願易名而字之。予思古之人生子三月。而父名之。避其在常語而難爲諱者。所以爲他日爲父計也。故曲禮曰。不以國。不以日月。不以山川。不以隱疾。而春秋傳亦曰。不以官。不以畜牲。不以器幣。讓生已久矣。雖其名無國官日月山川隱疾畜牲器幣之犯。而犯舉世人之常語。使其子宜如何而諱於今哉。亦觀夫治絲乎。其緒之弱。不大於秋毫之末。力引銖鎰。則紛然而絕。苟治而繩之。則可以轉百鈞。故曰。王言如絲。其出如綸。言綸者。比其類而合之也。或曰。青絲綬亦爲綸。爲訓雖異。其組織爲服。亦垂首千百。而比其類爲之也。反而求之。蓋人心之善。惻隱羞惡辭讓。是非四者之端。其始甚微。其絲之緒乎。學者爲能體驗擴充之。使可以放四海。塞兩間。其比其類之綸乎。邵子曰。人於心上起經綸。士而知此。始可語自治治人之道矣。名以綸。字曰治夫。

梁氏三子名說

梁宣慰君三子。其伯也。旣名矣。由犯先諱。求予避之。嘗聞誦簡約而嗜靜。重遲而可久。然先民以湛靜安舒者戒於後時。予懼其流或後事也。惟力於果敏。斯可正其失。質諸字訓。有以疾爲适者。古之人有伯适。南宮容亦名适。然司馬長卿以慕蘭名相如。趙相國鄧高密名不避堯禹。士而希賢。固其志也。伯适南宮奚避焉。故名曰适。而字亦不能卽其舊。又易曰子容焉。嗚呼。伯适同名。南宮一字。吾固以先賢望子。适曷知自勉哉。其下二人。仲曰迪。叔曰述。有父兄者。迪以蹈之。述以繼之。無所自遂焉。亦孝子悌弟之一事也。然古人之名。有非徒義意之是擇。如伯達伯适。仲突仲忽。叔夜叔夏。季隨季驕。必二人相從。而諧其韻焉。可謂言無所苟出。而有章者矣。故予於适迪述。亦三人諧韻。其古之遺意哉。迪述未冠不字。

高氏諸子名說

袁之上佐洛人高直夫。以予少與其先子游。拜於洪都。請爲其子姪十二人製名爲訓。長曰統。次經。續。緝。約。維。絢。紘。紱。絢。綱。且字而序之曰。家政統於尊。其傳者大。小宗之子。傳必立法。法立而家道用成。統宜曰元宗。經元立。續元用。然非本學。亦烏乎成。學則始思。思而成。輟則怠。而不能文。又有要焉。必由博而趨約。固以守之。而後德業積中。輝光發越。而不可掩。譬設色然。必先資夫可受之質。繹曰元思。緝元文。約元博。維元固。絢元質。絢之所以華身者。莫服若首紘。膝紱足絢。曰元瞻。元粲。元履。衣之文備矣。又惡其著。綱以尙之。故綱曰元著。其意義相仍。皆有徵於書。然字者名之副也。有是德。則爲稱情。無之而弗自勉。亦非予鄉先生所期於後來者。

題跋

跋雪堂雅集後

釋統仁公見示雪堂雅集二帙。因最其目序四。詩十有九。跋一。眞贊十七。送豐州行詩九。凡五十篇。有一人再三作者。去其繁複。得二十有七人。副樞左山商公諱挺。中書則平章楊九思。右丞馬紹燕公楠。左丞楊鎮。參政張斯立。翰林承旨則麓菴王公諱磐。董文用。徐琰。李謙。閻復。王構。學士則東軒徐公諱世隆。李槃。王惲。集賢學士則苦齋雷公膺。周砥。宋渤。張孔係。趙孟頫。御史中丞王博文。劉宣。吏曹尚書則谷之奇。劉好禮。郎中張之翰。太子賓客宋道。提刑使胡祇遹。廉訪使崔瑄。皆詠歌其所志。喜與搢紳遊者。求古人之近似。惟唐文暢。故柳送其行曰。晉宋以來。桑門上首道林。道安。慧遠。慧休。其所與遊。謝安石。王逸少。習鑿齒。謝靈運。鮑照。皆時之選。夷考其言。有得有失。其失者。以天官顧少連。夏官韓昇之徒。爲有安石之德。逸少之高。鑿齒之才。其不倫何啻相去千百而十一。又且近諛。其得者。文暢亦桑門上首。時不相及。方以林安遠休。夫誰曰不然。與以靈運明遠之文自居。皆無愧德。斯自唐視晉宋者也。自今而視唐。獨不可爲之比乎。柳之頌文暢曰。道源生知。善根宿植。脫棄穢累。宣滌凝滯。施之仁公。亦聲聞稱情而不過者。然求如靈徹。澄觀。重巽。浩初。元嵩。文郁。希操。深潛之流。與文暢生同其時。若是之多。則仁公爲獨行而無徒矣。又彼少連。畢者。豈足躅二十有七人之遺塵。而求安石。逸少。鑿齒之德之高之才。吾亦不能必其當者何。

人況文乎哉。其敢以靈運明遠自居。如柳州者。蓋不知其誰也。然此中予未之識。四人鎮琰好禮。瑄然已皆物故。其存者。閻李兩承旨而已。可爲人物眇然之歎。至大庚戌秋八月下弦日跋。

跋張夢卿所藏紫陽楊先生墨蹟

此先婦翁紫陽辭翰也。嘗聞其幼時文已奇。由歌白水滿長於紫陽閣底清風細之句。遂號紫陽。初名煥。後由上金季主河朔中興頌。季主壯之。置紅篋中。黃龍戰北。紅篋爲我元所獲。恐蹤迹物色。姓名獲戾。宜避。更爲免。及後受我太宗簡文制。誤免爲英。遂不敢私更。始就名英。其平生於書。差喜米南宮。故筆法時時似之。其卒以乙卯時燧已聞。公遺命託二事於我先世父。一遺文。二以先妻見配。時燧未婚也。其歲上距今二十四年。當至元戊子。張總管夢卿特來求題。夢卿嗜古博雅。該洽之士。慮其未得平生之槩。故斂襟書此。其年二月。子婿姚燧觀于穰城寓舍。

師濂堂跋

周君宣仲以師濂名其堂。濂溪萬世師也。天下師也。而況派其宗者哉。夫子爲宋朝正學之祖。師夫子取水初源也。侯師聖見程先生。語未徹。往見夫子。語三日。自謂如見天之廣大。再見程子。程子曰。是必從濂溪來。師濂之功如此夫。雖然。侯生之言。只可隔壁聽。程先生終未深與之何也。受學之初。每使求仲尼顏子樂處。旣得矣。吟風弄月以歸。有吾與點也之意。嗚呼。是真師濂者乎。故師濂者。當如程子。寶祐五年夏閏之晦。姚燧書。

書觀臺劉氏嘉蓮卷後

往年燧在翰林。使有持憲節于山之南。曰馬公煦者。馳書來言。吾邢之觀臺劉氏所自出。先夫人之兄軌。字子範。蕃字子榮。皆金文臣。其官所止。舅範京兆轉運判官。榮汶上令。方範決科之年。池蓮一茄數花。十三亦祥之不世有者。雖見之夷堅續志而略。願特筆之。時以史事已修。而未之進也。無遑致思。今年以葬告還郢。郢適公所督刺郡。再書促之。乃求續志以較。謂範易轉運爲按察。又不載榮登第。嗚呼。志所傳聞。不若其甥之可信。惟十三花者爲同。因思草木之祥。或以二而合。或由一而分。二焉而已耳。甘泉之芝。九莖同葉。河中之木。異本連理。此以二而合者也。漁陽之麥兩歧。李翁之禾九穗。此由一而分者也。然未若是十有三花之分之多。豈天鍾祥不以言喻。惟假草木得氣之先者。異其花實而示人耶。其旣應範榮一世而遂泯泯已耶。無亦猶右遺嗣蒙其未斬之澤也。然是氣也。所以父母萬物者也。和之盛。或溢而旁暢。他達如人子於其父母。貌必有一肖焉。何也。隨其氣之盛者也。夫天鍾祥於劉如是。固不專範榮兄弟之身。亦必及先夫人。移其盛於所家者。理容有也。故公兄弟蟬嫣簪紱。列居臺閣。他日載勳旂常。勒銘景鍾。未可知也。夫然後可當宅相十三花之祥。

跋西溪珍翰

中執法之書。計今在人間者。無慮數萬番。而諸賢獨感泣此軸者。由張君式者不忘知與求評賞之也。嗚呼。古之人所重乎門生故吏者。豈不以是夫。使其遺嗣人人持是手澤。求光前烈。其爲先友者操筆之情。

又何如也。至元蒼龍壬辰暮春。姚燧跋。

書米元暉畫山水

米敷文之畫。全法其父。山水樹石。不事工細。多以雲煙暎帶。只喜作橫挂。長不三尺。自題曰墨戲。今此獨雙幅鉅軸。豈當時奉詔與朱敦儒輩對畫禁中者耶。真曠代希有物也。張肖齋夢卿以至元戊子夏四十千購得之。姚燧寓目焉。爲識末幅。

銘

簡儀銘

舊儀昆侖六合包外。經緯縱橫。天常斜帶。三辰內旋。黃赤道交。其中四游。俯仰鈞簫。凡今改爲。皆析而異。取其案元文類疏明。無窒於眎。四游兩軸。二極是當。南軸下貫。赤道天常。案此二句元文類作南軸攸齊下乃天常天常不搖。則乾安靜。案此二句元文類作維此欹傾取軸槩應上鏤百刻及時。初正赤道。上載周列經星。三百六十五度奇贏。紫微安加北極。攸戴穹然突出。狀同倚蓋。別置立運。下履地平。錯勒于隅。十二子名。五環挈周。丈有八尺。紫微等之三旋在一。六環之安。三負衡旋。衡綴闕矩。隨振流遷。案紫微以下十六句元文類止八句其文曰地平安加立運所履錯勒于隅若十二兩環闕矩。隨振留遷。子五環三旋四衡繫焉欲知出地。究茲立運。去極幾何。卽游是問。赤道重衡。四弦未表。案中州文張上絃案作結。北軸移影相望。筵案元文日用一。推星兼二。定距入宿。兩候齊眎。巍巍其高。漠漠其遙。蕩蕩其大。赫

赫其昭。孰曰無形而兼蹟考。案此二句元文類作步仞之間。肆所蹟考。明乎制器。運掌有道。法簡而中。用密不窮。歷較古陳。未與侔工。猗歟皇元。發帝之蘊。昇厥義和。萬世其訓。

釜儀銘。案釜元文類作仰。

不可體形。莫天大也。無競維人。仰釜載也。六尺爲深。廣自倍也。兼深廣倍。挈釜兌也。環鑿爲沼。準以溉也。案此二句元文類作振溉不洩。緣以滄也。辨方正位。日子卦也。衡縮度中。平斜再。案元文類作載也。斜起南極。平釜鑿也。小大必周。人地畫也。始周寢斷。寢極外也。極入地深。四十太也。北九十一。赤道齡也。列刻五十。六時配也。衡竿加卦。巽坤內也。以負縮竿。子午對也。首旋机板。案此句元文類作末旋機杖。竅納芥也。上下懸直。與鑿會也。視日漏光。何度在也。陽谷朝賓。夕餞昧也。寒暑發斂。驗進退也。薄蝕終起。鑒生殺也。以避赫曦。奪目害也。南北之偏。亦可槩也。極淺十七。林邑介也。黃道夏高。人所戴也。夏永冬短。猶小差也。深五十奇。鐵勒塞也。黃道寢平。冬晝晦也。夏則不暮。永短最也。案元文類林邑介也。下即接深五二句。奇作二。黃道夏高作淺。赤道高。戴作載。夏永冬短。作夏短冬永。小作少。黃道寢平作深。故赤平暮作沒。安渾宣夜。昕穹蓋也。六天之書。言殊話也。案四句元文類止作二句。曰二天之書。曰渾蓋也。一儀之揆。執善悖也。案之元文類作即執善作何不。以指爲告。無煩喙也。闡資以明。疑者沛也。智者是之。膠者怪也。古今。案元文類作過考。巧歷不億。輩也。非讓不爲。思不逮也。將闕天朕。造物愛也。其有俟然。昭聖代也。泰山礪兮。河如帶也。黃金不磨。悠久賴也。鬼神禁訶。勿銘。案元文類作庶。壞也。勿。

太史院靈臺鐘銘

靈臺設簾幄以尊。懸間大呂。非其景。擊曠善鼓。手自煩。宮商良諧。等釜盆。請勿以聲以功論。一日之中。兩昕昏。二十四鳴。有度存。九圍一圃。折柳樊。黔首時作。時饗殮。日月如是。相告敦。三辰聽命。循軌垣。四序不忒。迭寒暄。萬物生翕。盈乾坤。何獨治歷。迨此源。凝熙帝績。高義軒。積世而運會。而元。吉金之舌。慎莫捫。輟響誰其代天言。

大朝元宮鐘銘

吾聞儲祥千石之鐘。離世蕩。訏不脛而趨。朝元之宮。器碩而聲洪。震百里而千層穹。千柱之下。侯叟侯童。萬指攸蓂。旦旭而昏蒙。其出其作。其偃其饒。必告而使之齊同。尙其微功。從可卜斯道之污隆。方昔汚也。金函索索。以灰滅。故噎希聲而爲聾。及其隆也。玉書幡幡而天出。則播大音而爲聰。矧善藏用乎中。不擇棄人。皂隸王公。手以問之。喙應無窮。如橐之鼓風。我書魚蟲。畀之鏤工。期萬斯年。與之宮兮相終。

宣慰都司郭君實持眉歛研相壽僕以端研報之渠後遺姬令伯陽

端爲州濱海浦。孕奇石。研資取。雖器也。視爲主。彼其子。腹枵囊。求一辭。瘖不吐。第塵棄。瓦甃伍。中道歸。伯陽父。遷喬木。鶯其羽。之賢胸。蟠三五。出言章。氣風雨。述聖哲。誅姦竄。其爲價。琮琤琥。資山石。非速腐。後視今。今猶古。讀吾銘。孰敢侮。

劉無競歛石研銘

夥歟之產石則實黃金爲聲蒼壁質德先如是疇可匹無競惟人士之吉銘以發幽友燧述
贊

無名人眞贊

古之遺直今見髣髴何其百年凜有生意緬懷用世愈益可畏宜使羣公笑言寬味烜赫大名其所被衣
世百年千其有可旣也耶

太傅楚公像贊

盈常之躬碩大而豐氣肅而神充自非降嵩與三光之鍾能生上材之偉雄

牧庵集卷三十二

賦

烏木杖賦

去年史仲威得烏木杖。大徑尺。高可過額。嘗析一杖遺余。許爲賦報之。其秋仲威疾。歷三時未勿藥也。今年余生朝。使人肩木之半相壽。且促曰。吾疾於以嬰綿者。豈思不償賦致耶。不佞誠得一誦其辭。或可釋杖而起矣。余勸其言而賦曰。

或曰。炎海之山。珍木產焉。金爲之聲。石與其堅。魑結伐荷。投諸瀧淵。依居蛟蜃。漱沫濡坎。歲月俟之。化而爲元。要出人爲。非得自天。此島夷假以售利於中土之微權也。抑齋聞而笑之曰。昔賈鬻鞭梃蠟其膚。市者一濯。已呈蒼枯。胥是黝材。裏表一如。從可占知。迺受形其本初者也。胡子以由彼而然乎。今夫中山之山。有衆其植。斧取觀之。內各異色。樟作稠文。杜棗栲赤。檀柏柘黃。蒲櫟槭白。與爾萬里。遐裔絕域。瀟嶠杉紫。儋黎沈褐。鬬寶雞舌。相半白黑。一隅斯舉。三可反蹟。茲度品之爛爛。果熟漚以何澤。况於兩間。滋雨噓風。敷土華耀。爲白爲紅。深淺濃淡。萬不齊同。令人感之。欣心悅曠。問誰爲之。能然皆著妙於化工。夫其見諸柯葉之外者如此。又何惑理質於其中哉。且水火之赤黑不一其色者。雖童子猶能知之。至語其相賊而爲用。有戴白之老所未知。維男丁與婦壬。實雄黑而赤雌。始若離而難馭。終爲夫之所移。今其色之幽

幽乃昔赤之由基。是何資於遠譬。只煬竈亦可關。彼炎赫而烈者焰也。其烟液爲煤必黔而緇。因以曉夫巧繪之棄鉛朱。亦懼夫既久漫漶而爲黟。又以信道書坎盛之侵離也。不然南服之洲。祝融之宅也。歟。金石而焦流。蓋火熾之已極。非盛其水以滅之。則物將不能以生活。故伊人之睥面不渥赭而深黑。亦火色索藏惟獨見。夫水而已矣。其木理之如漆者。又何惑乎哉。史鰌之孫。其畏可象。析而杖之。奔走相餉。輟矛廬於猛士。配几屨於席上。試扶衰以起策。觸爪甲而鏗響。思卷鐵而含簧。陋柳侯之爲匠。必求同於所異。纔黑蛇之彷彿。噫。物之變化不可期兮。猶足以乘雷而騰往也。

五言古詩

寄王憲使立夫

庭樹生秋風。炎熾奪如失。小蟲鳴嚶嚶。高隼飛歎歎。緬懷素心人。若髮未忘櫛。百年能幾見。過眼徂電疾。而君有官事。出言千里律。何暇喜蛩音。情與逃空一。昨因趙卿至。戒遣書新述。篇軸不害多。無憚費紙筆。且約來北州。罇酒留十日。晴天逼佳夕。共看華月出。非不思餘論。門無一親卽。吾私如汲車。已脫復縈繻。晚菰生待種。早稻行可鉦。少須黃花發。秋風亦蕭瑟。倒冠獨山巔。茲遊或能必。

次韻閻子濟二首

我友宋僉憲。頗聞思湘中。每云所遇奇。未易言說窮。崇蘭春風花。巖桂秋露叢。三年一官內。身在香國東。

朝航汨羅波。翻動海日紅。暮掛嶽麓寺。蒼烟樓觀窿。喧喧名都邑。百貨聚商工。何時訪君遊。盡歷西南雄。霜水收風濤。江船穩歸路。惟應江間月。照汝來往屢。長沙隔南雲。尙飽艱險趣。天涯念棊錯。睽閤皆舊故。新知苟會心。何必歡有素。黃鐘未懸業。衆日齊瓦釜。大音故希聲。欲說難至戶。况我言毛輜。誰復聽其句。所恃君盛年。學仕猶未暮。丈夫重道義。自足輕外務。觀今紛華儔。慍喜隨一芋。願終藏山書。榮於鹿鳴賦。

寄徐中丞容齋

李侯安慶來。遭君江間施。問云歸湍水。示聲偶及我。自揆衰鈍質。舊學日兼墮。百事於大賢。資取無一頗。始疑逢蒙弓。亦有虛發筈。終知匠石斧。材不捐瑣瑣。增慚失喜餘。背覺芒刺荷。平生聲相接。睥面見未可。文字親友間。屢得觀藻火。况聞閑世故。盤走夜光顆。仰止高山思。願並餘子夥。歷推天日行。蟻右風輪左。吾徒不相值。其故正此坐。何時廣陵遊。傾蓋願終果。

寄岳教吳忠畝

我友右轄公。人物慎臧否。獨于甌閩士。推心一忠畝。勝國已太博。椽筆入其手。用之敵千將。可斷姦竄首。一軌名始北。上徹宸纘黉。蒲車嘗及門。章以疾自守。不使橋門觀。執醬餽黃耆。余聞敢藐藐。日月藏心久。秋風歸天岳。往綰州學綬。堆盤青青橘。求薦傾蓋酒。何人天壤間。亦有牛馬走。問知爲高賢。重壓邱山負。行年滿卦數。不見顏如叟。翻比少九齡。衰悴先蒲柳。只看形諸外。已卜內所有。如何辭萬鍾。反就祿升斗。無乃仁人心。終始一善誘。非有金鏞德。安應小大叩。且溫右轄語。通誦或盈口。因知人有媒。言出隨好莠。

豈但資娶妻。亦賴用擇友。不期一日中。三接杖履後。甚欲進所業。一嘗恐輒嘔。至今貧賈肆。深積千金帚。湫泉聞素心。亦誤見私厚。諷讀卷阿篇。明璣照軒牖。其稱媚天子。例必登拜受。鄙言何足道。魚目辱兼取。敢不先木桃。旋期報瓊玖。

挽孟商州元亨

六里商於山。而子往倅之。人嘗隘其邑。霜蹄蹋權奇。所欣多曠暇。得以放瓊辭。城闔四皓墳。下有餘紫芝。長吟薄采采。薦以松醪卮。娛樂豈不仙。久此壽奚疑。如何奪善地。調降華判卑。方聞有力僞。揚譽於雲逵。佳城鬱長夜。白日見無期。因傷先待制。抱業既未施。積藁宜及躬。年位亦如斯。覽古事每爾。爲昌來者基。秦藩官聯曹。生別且長思。雖余後聞訃。宿草寧不悲。春水清漣漪。營魄今何爲。

挽甥堦

趙商來叩門。袖出史侯書。開緘條惻愴。知汝已元閭。是侯太尉子。兩嘗妹壻余。汝視則婦翁。見訃語豈虛。有疑讀反覆。不見日月初。汝昔似猶子。嗣業文貞餘。文貞今留侯。乏世理可噓。吾甥顏葬豔。令譽由閨居。及婦劉氏門。輓紛結華裾。其姑况難事。厲色歲一舒。前年一子生。在亡未知渠。茲焉抱惻養。茹苦何日除。南州穰侯國。臨湍上高墟。東望酹一觴。老淚血漣如。呼魂遠致否。已矣何言歟。

京師病中六首

誕士以爲格。小大不異形。尺箠以叩之。千百不同聲。耳去目能幾。同異乃爾爭。二物於吾身。受形與俱生。

云何一易地聞見皆瞿官況於六合間擾擾羣黎行妍醜既殊狀賢德豈齊情區區出門交心曲安可明
臚仕初足華終竟外侮擾人云禦之策惟有安歸耕

古人不若意得酒以自歡而我不能飲安敢憂患干臥病兩月周日夜防痺殘神州桂玉地富至居猶難
三千里外身驅率就一官吹灰終不然豈但枳棘塞囊空到稱假豈能久盤桓又顧穰城家新立四壁單
小兒雖善步神骨尙未完吾家三族中慰意獨此看思之腸九迴何以生羽翰

少年厭治生但慕官爵好騎馬雜高蓋奔走長安道雖有良田園廢沒但蕪草及爲荆楚憲盡室辭豐鎬
登山復涉水往費尤浩浩黃金火銷冰質賣無一保豈無升斗入喪失岳山倒滄海去悠悠白日行杲杲
朱顏先顛顛素髮亂蓬葆今年四十九知非殊不早稔嚼世味薄滿口木膚槁人云豐城後接武瀛州島
安知走朱門惟去是求禱朝允暮載途南土甘投老買宅亦已得求田不多寶此邦衣食易宜稻及桑棗
時節勞農苦對酒釀一考與汝車上妻從人喚翁媼

束髮慕元理佩服三皇篇于周桀可覩不受天老傳得此西南朋飛龍亦潛淵神哉中夜氣使我沈疴痊
如何負道德齶齶區中緣逝將脫塵鞅庶永桑榆年

寒風振虛幌蘭膏淡無姿披衣復撫枕傾耳候農雞夙昔不成夢憮然嗟吾衰盛年苟無聞光景忽若馳
欲爲流水吟朱絃爲誰揮恥從季主卜將與陵陽期

古來方術士越人與長桑採芝鍊五石繫肘皆神方伊余抱微病湯液已徧嘗斯人不可見反側心煩傷

倏悟養生理。靜極神明康。致物以卻老。嗤此竟渺茫。

平章廉公挽章

嗚呼平章公。懿質天所性。氣鍾三光粹。量包九澤淨。加以資學問。寸晷如與競。不有斯人徒。孰佐天子聖。山立當軒陛。侃侃言議正。蒐賢及耕釣。巖藪沾幣聘。十年泰階平。四海弓不檠。餘材管蕭匹。餘子非季孟。事隨乃來毀。輦轂奉朝請。名園平泉比。花石不可姓。門前施行馬。外物軒冕盛。相過盡詞伯。聞至倒屣迎。清風佳月夕。劇談雜觴咏。絕口溫室樹。肯干蘭省政。屢典千金裘。好客遠慕鄭。焉知靈臺上。憂世常炳炳。天下尙可爲。惜哉司馬病。何期龍蛇歲。壽僅滿知命。憶昨訃下初。遠近聲淚併。胡天陋巷仁。反福東陵橫。巫陽不可作。百載生不更。豈其黔羸遊。默運元化柄。其栖景星鳳。出爲斯世慶。將遂爲神明。山川主零禁。蒼蒼高在上。此理幽莫鏡。優孟效叔敖。猶足楚人敬。况公自有子。毓德宜爾令。不見提刑君。氣岸殊豪勁。秋風鷹隼厲。肝膽裂梟獍。他日霜瀾平。勳業未可竟。一門周司徒。竹帛相輝映。

時苗留犢圖

君子中庸貴。不專行怪高。嘗讀稗官書。抵掌嗤時苗。生犢當去縣。還汝故主宰。得妾以其子。宜往何所留。理在不可推。如瑟柱傳膠。畫師斷章耳。意取警貪饕。貌爲盈尺軸。丹青爛生綃。二十餘七人。妍醜兼蒼髯。目既殊盼睞。手亦異持操。或戴爐炷香。或捧卮薦醪。或擁板伏揖。或撫手逍遙。或結領竚思。或左顧有求。或岸巾爪額。或拳拱僂腰。或賞彈指嗟。或戚反袂號。或向緇黃列。致辭前不休。或含春風姿。鬢髮雲爲翹。

仍攜兩童女。芳年未蘭若。婆娑輟緝麻。倚中顏弗妖。或荷囊鞭犢。或弛擔挾輶。可傷轅下轡。滿脰黃鐘牟。忍割舐子愛。如彪念楊修。凡此舉隅耳。曲折態豈周。名不著爲誰。代可必前朝。位置內供奉。無乃王雲曹。憶與三害圖。高下不相超。所恨百里侯。骨相尋常流。不見操介介。盡醉容昭昭。以是方古作。如武美節韶。余評法魯史。功罪不少饒。詩拾畫記睡。僵走追韓豪。已架屋下屋。他日從人嘲。

荏葦嘆

灝江不可禾。歲惟葦葦苗。青林無端倪。永與江水匹。由爲薪蒸恃。責以租賦出。園人誠貪夫。苞苴黃金鎰。暮夜鑽權倖。入牒妻子質。輸課或未償。沒之良不恤。他家豈辦爲。得者皆富室。秋風霜霰落。百穀時已實。處處傭千夫。豚酒健刀鉦。稠載向城市。官外私羨溢。遺滯狼籍陳。入者必見叱。或因取束蘊。隨以盜米律。春風將新萌。剪伐未十七。下策付一炬。災火赤天日。坐視煨燼空。不丐民貧疾。因推是爲心。可見無仁術。周官行虞禁。爲法未爾密。亦已開市源。千年誰能窒。

舟中落梅

折梅天門山。含白未舒萼。東風登臚去。一笑破孤酌。嗟汝如佳人。賦命所向薄。縱拔榛菅蒙。還持媚蓬籜。方彝縮頸脰。借潤江一勺。固泛水月奇。復避霜雪虐。曉芳惟衣襲。夜影燈與約。相攜千里行。十日春有腳。開敷既爛漫。理亦宜飄落。正愁鄰橋姝。橫玉裂纖弱。遙應故山樹。綈袂已寂寞。紛然委泥塵。無此藉茵幕。卻有和羹須。旁求到巖壑。幸否相倚伏。世事安可度。益感先民言。貴賤隨所託。

書懷二首

南州仲冬月。天氣如春暄。旅貧無衣褐。差便卒歲溫。矧又稻麥價。倍徙賤都門。不待付千錢。翠濤激盈罇。瀏瀏水泮冰。舉網鱸鯉繁。蔬茹不鹽酢。旋擷青青園。謀腹易爲飽。足頤道義尊。地偏席門外。時有駐高軒。華簪惠秀句。欣賞難具言。已可慰離索。適我從弟舅。五馬近守裕。思往三日瞰。考槃在茲陸。吾駕無回轅。麴生素狂士。濡首相禍賊。誓言遠絕之。麴生慍見色。前陳君處世。簪笏已鷄肋。貧賤交態薄。獨我時在側。旣通知舊好。亦健文章力。衰顏借渥丹。愁壘助攻墨。論功猶小小。况有此大德。君看無何鄉。與彼華胥國。百年忘彭天。萬事齊失得。是邦去人間。奚翅路千億。非我導之往。君安有羽翼。不知何所負。而乃見猜愴。君誠中道棄。豈無他人迹。聞之始自曲。前語吾其食。願終平生歡。相對怡朝夕。

送朱教授野翁赴都下

江東窮秋月。風露已淒清。候蟲息沸響。朔鴻喧哀鳴。壯哉騁人子。裹糧事北行。都門于茲時。飛雪九衢平。市求一狐腋。委擲黃金輕。廣文先冷官。未愁與寒爭。况恃身上衣。手線留縱橫。不須更挾纊。襲可春暉生。但愁觀國光。牛後羞羣英。長安足故舊。朱輪照華纓。蒐才佐昭代。不遺一藝名。譬彼求王人。路無棄連城。夙料身未至。薦剡有飛聲。藉此一簣基。旋觀臺九成。相摯或見問。爲言親敲榜。晨夕几間書。促促衡石程。無庸移文至。始反北山耕。

題姚嗣輝南橙堂

彼禮有土性。生植惟峨岷。纍纍千雲姿。才與樗散鄰。匠石過不睨。煬夫取蒸薪。所貴故山樹。寧計世莫珍。一別十畝陰。清溪俄幾春。華名堂楣上。如對故鄉親。請事小弁詩。桑梓亦惟寅。盛德古自卑。木惡何關人。不見樗里疾。智囊終相秦。君才負棟柱。未許溝斷均。無以權自期。上孤明堂晨。

送梁貢父尙書使安南詩并引

貢父吏部。交予最密。以年偶先。嘗兄之。較其逸足絕塵。予輩皆瞠目乎後者。今使絕域。賦長韻以送之。

茫茫今皇輿。歷古疆理徧。溟海無洪波。喬嶽失絕巘。萬方爭率職。象胥不能件。如何南交宅。琛貢走藩衍。中塗俄負固。至爾勞師遣。崛強尙與爭。爲識無已淺。聖量終含宏。恐彼宗社殄。前迷許新之。未忍再禽獮。親閱庭臣中。誰可銜命選。曰汝吏書曹。是境嘗入踐。更往喻斯旨。首鼠疑必免。君聞拜奉詔。臣技等鷹犬。惟所縱使之。綿力猶思勉。仍命百僚右。相率華飲餞。鞭馬辭神州。遭我乎漢沔。鼓榜壯于役。未暇兒女泣。似聞陳王氏。學以究墳典。文物知慕華。舉俗已丕變。因失事大禮。無媒自求戩。君至敷利害。覺臺專對善。正如沈疾人。發藥得和扁。必感丹旻衷。偕來覲旒冕。白雉隨以入。黃屋亦席卷。何減陸大中。儒生服鄒竟。鹽書入南越。坐屈尉佗辯。但乏囊中裝。歸路千金輦。功成貌麟閣。竹帛日星顯。多少前使僞。垂頭視人覲。

雲東樓

君家雲東樓。未暢昔所題。問言雲之東。下有吾東溪。翩翩多諸黃。玉槩華簪齊。無因我其舍。屢容躡丹梯。

于時十月半。風雨號雙淒。八荒同一雲。豈辨東所倪。平生未至地。愈望溪愈迷。但愛樓中兒。鴻序參差低。大兒行酒觴。小兒盤栗齋。婉孌膚玉雪。嶢嶢頭插犀。門楣已可占。奚由墜塗泥。且歡盡今夕。明日當分攜。歸舟何所逐。泛泛並鳬鷖。雲東樓中牀。竹裏雙鶉啼。雲東樓下花。移芳滿城畦。兩皆思君物。凝望雲東悽。每壯尙意氣。門馬堂滿歸。誦我雲東詩。回首還雲西。

田氏樂門堂

憂樂惟聖人。萬古無少蔽。所樂乃樂天。所憂在憂世。不悖可並行。譬彼巫醫藝。巫云疾當死。無日中野瘞。爲子猶拜醫。懇悃求投劑。巫者猶命言。醫則以義制。萬事天人雜。略不相鑿柄。後人昧樂天。顧託門永誓。揆道良不可。忘君自爲計。一塗或庶幾。奔競差可礪。田侯非楚產。今卜宅三澨。良駟滿千蹄。連阡禾稻翳。考槃願止此。暇食誰之惠。豈惟憂世忘。其樂亦已細。南風墮華教。堂扁託書隸。已有雪崖筆。妍壯安敢僣。翻思漢諸田。實出重華裔。吾姚源媿汭。循本皆同系。平生未傾蓋。深言應速戾。要爲兄弟警。慎莫輕裂眚。作詩至元年十月戊子歲。

題肖齋覆瓿藁

至元戊子十月上浣。余啜茗肖齋。偶見覆瓿藁。漫不知何人之詩。質諸夢卿。始得爲渠作。持下帙歸。再日反覆究觀。古意疏暢洞達。近體清拔奇警。有作者風。實足起余。爲次首章岳祠韻。以見推服之私。其詞曰。

將種張川道。六籍窮軻邱。矧於前人光。克對實無羞。清名海嶽著。廉潔冰露修。惜也蘊未伸。封猶千戶侯。興移登石廩。萬象供冥搜。東睽扶桑波。北瞰洞庭流。一杯英皇弔。爲洗蒼梧憂。重華老南征。其故難詢諏。復思靈均降。攝提貞孟陬。真堪書咄咄。已矣賦休休。

至元辛卯。再過吳城。王祠師雲谷。示東坡所藏石磐。留詩贈之。

別來四周星。尙爾雙鬢綠。且矜氣彌厲。能新火餘屋。因知道氣深。舉羸當時屈。我髮已霜草。衰薄不禁沐。豈但形容然。志亦忘石鏃。今年雨何甚。湖漲冬未伏。白浪如銀山。行舟避騰蹙。倚欄乘雲閣。聊以寓歸目。非君誰能來。寬此冰炭腹。

夕佳亭

甲午冬十月。洪都雨潺潺。三旬乃一霽。羈思忽若刪。驅馬柴君居。突兀拔布闌。炎州清霜晚。林葉恰半殷。已有朱茶花。照耀菊斑斑。亭依湖東岸。坐對江西山。西山兩舍外。如立步輦間。鮮鮮沐濯餘。翠葆萬煙鬟。夕陽借佳景。盡發天所慳。只知柴桑翁。芳躅人無攀。焉知此凝睇。亦與飛鳥還。主人退自公。時得兼爾閒。明朝駕君去。依稀動心顏。

吳君澹軒。以大德甲辰冬。自潭移錄道教於洪。示內相疏齋前爲潭憲日贈別之什。燧賦跋之。誤書澹軒爲鶴臞。亦道流善詩者。還之。欲余改書。以無暇。并前書失之。而來求數數不置。爲別賦此。

詩僊石崖殞。繼作惟澹軒。嘗示余三藁。披閱再朝昏。盡卷長太息。造語清而敦。豈於三百篇。口吟瓶水翻。

非然學猶龍。寄身道紀尊。理洞萬物母。氣完中夜存。所以兼儒能。由心徵其原。洪都一傾蓋。以受儀茶溫。旋出疏齋叟。湘東贈行言。寶唾楚臣拾。結貽皆荃蓀。既爲大夫譽。月旦窮疵論。因羨靈奇賦。偏爾鍾斯門。閒閒隔神州。聯璧難弟冢。何時聚伯仲。貫如吹簫壘。當今載廣輦。噤舌無庸捫。

題趙平江令清溪

昔我行簡地。生齒經戰伐。蕭條煙火稀。路紆豺虎窟。是時霜天後。黃葉隕林樾。彌望皆青山。巖岫高兀兀。下有清溪流。未審何源發。濺濺寒碧流。爽欲徹毛骨。朝漱巫峽雲。夜泛峨眉月。主人已避地。何所猶奔突。安知卽令君。臚仕方吳越。且恐清溪名。寂寂人不曰。身縱不果歸。取名目表揭。而我豈善文。詠詩慙求謁。知君桑梓志。未忘西車軌。何時眞脂草。一弔故城闕。還訪清溪水。獨喜存不沒。但慮彼淪漪。反不識華髮。開樽磐石上。坐歎遺簪笏。莫使猿鶴儔。相噴泥塵襪。

落照

落照在東壁。倒影西牆紅。我身恍自失。如坐虹蜺中。問誰爲此幻。無乃由天公。故出新巧奇。欲試詩律工。彼哉誠善戲。拙技恐易窮。斯須忽變滅。寒雲翳蒼穹。

右承索賦復有此作

南地秋冬際。五月無雲陰。上帝遣心膂。用汝作傳霖。新苗飽新澤。布地勝布金。吾民未乘高。示爾風雲侵。世事祇如此。憂樂長相尋。皇天老眼在。一如父母臨。人心惟順受。天意良自斟。助爾耕墾力。實我豐穰心。

無非聖所感共戴君恩深

和渾泉二首

老成稀何如。月出數螢燭。一粲見典型。誠想優孟譔。三年東吳走。敬望縫掖綽。歸路得夫夫。欲灌四鄰淪。餘事乃文字。噓動如橐籥。愈出愈益奇。險韻安足縛。又凜如干將。脫鞘爛霜鏑。勿云乏鏤冰。滅迹郢斤聖。問渠筆何力。砥柱幹不弱。可方騶雕龍。不下韓逐鰥。僕僕雖亟拜。未酬嘉意酢。由茲一饜飫。噎噉屠門嚼。自許宜何施。庶幾晨門析。遽以安石輩。月旦無太錯。視君千仞鳳。巧弋避綰繳。何時鳴朝陽。免聒鴟鵂虐。壽人百年耳。過眼奔電灼。難聚真搏沙。易散劇飄蓬。相逢一觴詠。豈不賢棊博。由淵爾何人。願學言志各。草木凡根荄。託土乃恆性。獨暢弔蘭生。無藉地氣應。懸叢危檐上。朽索以爲命。青青雖弱質。不挫霜雪勁。敷花况妍好。妝陋桃李靚。依依光風汎。皜皜華月映。香疑非人間。恍若來空迴。詩老杖其下。清芬誰汝競。兒女奚自攀。安辱寶釵並。但愁姑射僊。綽約玉顏頸。一朝乘龍過。袖去逐無逕。我來昌邑山。豪欲分廟令。必云付環玦。與奪神所柄。不如且止之。俟旋滄江艇。殷勤先杯酒。隨以奇貨聘。歸詫石城人。管且化工盛。

楊補之墨梅

原注肯齋家藏

古之賢達士。名托技以傳。由來含毫人。不及縑楮年。雖求異世知。存一遺百千。偉也清富君。綠髮金印懸。脫落貴介習。博雅嗜奇偏。鉅唐鄴侯架。寶晉滄江船。墨梅取无咎。軸首珠犀填。使有透絹詩。詎讓花光前。虛堂清風夕。斂襟泛爐煙。對此冰雪姿。若失炎燠然。令人起幽思。杖履西湖泉。

武昌寄劉時中

思君誦君詩。賢於對君顏。昔也坐我側。守口如閉關。今茲言盡懷。翻宜隔湖山。文章靈奇氣。賦與天所慳。古人遊已遙。古風力孤攀。及肩曹劉壘。窺奧長信班。不取爲貧仕。傷和實清潛。仲尼且委吏。重耳嘗險艱。丈夫無不爲。大弼况能彎。入手無眼箭。安識邕容蠻。歸來弄綠綺。九霄鳴佩環。挾是文武資。未憂身恫瘝。大路橫至寶。誰不收裏還。報章因南鴻。滅影秋色間。轉令感白髮。羈思無由刪。

過開先寺

天人喜遊戲。試劍當層巒。截路萬丈崖。瀉出千丈湍。隱如白瓊瑤。蘊此青琅玕。仰睽轉飛動。有物相控搏。散空摩尼珠。受以頗黎盤。龍公日夜汲。陽早不敢乾。纔足供騷人。萬古詭異觀。我來過中歲。素髮紛垂冠。窮源歷絕巘。自懼身不完。但能至其麓。蔭翳松欒欒。嘉與萬上人。枵然坐蒼磐。揮杯吸微液。已足當朝餐。明發入黃塵。復爾俗務干。未期江山會。石城清夢寒。

過大孤山

左山如騰龍。右山如伏獫。約束彭蠡湖。秋夏傍泛濫。我行正窮臘。豪浪殊未歎。危檣蒲帆舞。日出風力贍。大孤水中央。千尺入驚覘。何人插雲根。上刃餘折劍。留示爾後人。萬古斷鼉鼉。至今鋒鏑赤。猶帶膏血染。昔當南北裂。夢寐當在念。一朝獲身歷。償盡平生欠。山靈必知詩。投畀未爲僭。

小孤山

彭磯擁千山。布陣如劉沛。小孤乃窮羽。獨戰氣彌倍。瀾瀾僕命之。砥柱非其對。層巔摩晴穹。雲木搖旆旆。大江中貫流。萬頃納一噉。東溟供潮汐。日夜至一再。去帆天馬奔。回首蒼鷺外。已愁風鶴還。進尺亦尋退。不及臨嶼岬。一覽淮甸槩。

